

পঞ্চম অধ্যায়

প্রথম পরিচ্ছেদ

বাক্য প্রকরণ

বাক্যের লক্ষণ ও প্রকারভেদ : ভাষার মূল উপকরণ বাক্য এবং বাক্যের মৌলিক উপাদান শব্দ।

যে সুবিন্যস্ত পদসমষ্টি দ্বারা কোনো বিষয়ে বক্তার মনোভাব সম্পূর্ণরূপে প্রকাশিত হয়, তাকে বাক্য বলে।

কতগুলো পদের সমষ্টিতে বাক্য গঠিত হলেও যে কোনো পদসমষ্টিই বাক্য নয়। বাক্যের বিভিন্ন পদের মধ্যে পারস্পরিক সম্পর্ক বা অন্বয় থাকা আবশ্যিক। এ ছাড়াও বাক্যের অন্তর্গত বিভিন্ন পদ দ্বারা মিলিতভাবে একটি অর্থ বা পূর্ণ রূপে প্রকাশিত হওয়া প্রয়োজন, তবেই তা বাক্য হবে।

ভাষার বিচারে বাক্যের নিম্নলিখিত তিনটি গুণ থাকা চাই। যেমন –

(১) আকাঙ্ক্ষা (২) আসক্তি এবং (৩) যোগ্যতা

১. আকাঙ্ক্ষা : বাক্যের অর্থ পরিষ্কারভাবে বোঝার জন্য এক পদের পর অন্য পদ শোনার যে ইচ্ছা তা-ই আকাঙ্ক্ষা। যেমন – ‘চন্দ্র পৃথিবীর চারদিকে’- এটুকু বললে বাক্যটি সম্পূর্ণ মনোভাব প্রকাশ করে না, আরও কিছু ইচ্ছা থাকে। বাক্যটি এভাবে পূর্ণাঙ্গ করা যায় : চন্দ্র পৃথিবীর চারদিকে ঘোরে। এখানে আকাঙ্ক্ষার নিবৃত্তি হয়েছে বলে এটি পূর্ণাঙ্গ বাক্য।

২. আসক্তি : মনোভাব প্রকাশের জন্য বাক্যে শব্দগুলো এমনভাবে পর পর সাজাতে হবে যাতে মনোভাব প্রকাশ বাধাগ্রস্ত না হয়। বাক্যের অর্থসজ্জাতি রক্ষার জন্য সুশৃঙ্খল পদবিন্যাসই আসক্তি। যেমন –

কাল বিতরণী হবে উৎসব স্কুলে আমাদের পুরস্কার অনুষ্ঠিত। লেখা হওয়াতে পদ সন্নিবেশ ঠিকভাবে না হওয়ায় শব্দগুলোর অন্তর্নিহিত ভাবটি যথাযথ প্রকাশিত হয়নি। তাই এটি একটি বাক্য হয়নি। মনোভাব পূর্ণ ভাবে প্রকাশ করার জন্য পদগুলোকে নিম্নলিখিতভাবে যথাস্থানে সন্নিবিষ্ট করতে হবে। যেমন –

কাল আমাদের স্কুলে পুরস্কার বিতরণী উৎসব অনুষ্ঠিত হবে। বাক্যটি আসক্তিসম্পন্ন।

৩. যোগ্যতা : বাক্যস্থিত পদসমূহের অন্তর্গত এবং ভাবগত মিলবন্ধনের নাম যোগ্যতা। যেমন – বর্ষার বৃষ্টিতে প্লাবনের সৃষ্টি হয়। – এটি একটি যোগ্যতাসম্পন্ন বাক্য। কারণ, বাক্যটিতে পদসমূহের অর্থগত এবং ভাবগত সমন্বয় রয়েছে।

কিন্তু ‘বর্ষার রৌদ্র প্লাবনের সৃষ্টি করে।’ – বললে বাক্যটি ভাবপ্রকাশের যোগ্যতা হারাবে। কারণ, রৌদ্র প্লাবন সৃষ্টি করে না।

শব্দের যোগ্যতার সঙ্গে নিম্নলিখিত বিষয়গুলো জড়িত থাকে

(ক) রীতিসিদ্ধ অর্থবাচকতা : প্রকৃতি-প্রত্যয়জাত অর্থে শব্দ সর্বদা ব্যবহৃত হয়। যোগ্যতার দিক থেকে রীতিসিদ্ধ অর্থের প্রতি লক্ষ রেখে কতগুলো শব্দ ব্যবহার করতে হয়। যেমন –

শব্দ	রীতিসিদ্ধ	প্রকৃতি + প্রত্যয়	প্রকৃতি + প্রত্যয়জাত অর্থ
১. বাধিত	অনুগৃহীত বা কৃতজ্ঞ	বাধ + ইত	বাধাপ্রাপ্ত
২. তৈল	তিল জাতীয়	তিল + ষ	তিলজাত স্নেহ পদার্থ, বিশেষ কোনো শস্যের রস।

(খ) **দূর্বোধ্যতা** : অপ্রচলিত, দূর্বোধ্য শব্দ ব্যবহার করলে বাক্যের যোগ্যতা বিনষ্ট হয়। যেমন – তুমি আমার সঙ্গে প্রপঞ্চ করেছো। (চাতুরী বা মায়া অর্থে, কিন্তু বাংলা ‘প্রপঞ্চ’ শব্দটি অপ্রচলিত)।

(গ) **উপমার ভুল প্রয়োগ** : ঠিকভাবে উপমা অলংকার ব্যবহার না করলে যোগ্যতার হানি ঘটে। যেমন –

আমার হৃদয়-মন্দিরে আশার বীজ উদ্ভূত হলো। বীজ ক্ষেতে বপন করা হয়, মন্দিরে নয়। কাজেই বাক্যটি হওয়া উচিত : আমার হৃদয়-ক্ষেত্রে আশার বীজ উদ্ভূত হলো।

(ঘ) **বাহুল্য-দোষ** : প্রয়োজনের অতিরিক্ত শব্দ ব্যবহারে বাহুল্য দোষ ঘটে এবং এর ফলে শব্দ তার যোগ্যতাগুণ হারিয়ে থাকে। যেমন –

দেশের সব আলেমগণই এ ব্যাপারে আমাদের সমর্থন দান করেন। ‘আলেমগণ’ বহু বচনবাচক শব্দ। এর সঙ্গে ‘সব’ শব্দটির অতিরিক্ত ব্যবহার বাহুল্য-দোষ সৃষ্টি করেছে।

(ঙ) **বাগধারার শব্দ পরিবর্তন** : বাগধারা ভাষাবিশেষের ঐতিহ্য। এর যথেষ্ট পরিবর্তন করলে শব্দ তার যোগ্যতা হারায়। যেমন – ‘অরণ্যে রোদন’ (অর্থ : নিষ্ফল আবেদন)–এর পরিবর্তে যদি বলা হয়।, ‘বনে ব্রন্দন’ তবে বাগধারাটি তার যোগ্যতা হারাবে।

(চ) **গুরুচণ্ডালী দোষ** : তৎসম শব্দের সঙ্গে দেশীয় শব্দের প্রয়োগ কখনো কখনো গুরুচণ্ডালী দোষ সৃষ্টি করে। এ দোষে দুই শব্দ তার যোগ্যতা হারায়। ‘গরুর গাড়ি’, ‘শবদাহ’, ‘মড়াপোড়া’ প্রভৃতি স্থলে যথাক্রমে ‘গরুর শকট’, ‘শবপোড়া’, ‘মড়াদাহ’ প্রভৃতির ব্যবহার গুরুচণ্ডালী দোষ সৃষ্টি করে।

উদ্দেশ্য ও বিধেয়

প্রতিটি বাক্যে দুটি অংশ থাকে : উদ্দেশ্য ও বিধেয়।

বাক্যের যে অংশে কাউকে উদ্দেশ্য করে কিছু বলা হয়, তাকে উদ্দেশ্য এবং উদ্দেশ্য সম্বন্ধে যা বলা হয়, তাকে বিধেয় বলে। যেমন –

খোকা এখন	বই পড়ছে
(উদ্দেশ্য)	(বিধেয়)

বিশেষ্য বা বিশেষ্যস্থানীয় অন্যান্য পদ বা পদসমষ্টিযোগে গঠিত বাক্যাংশও বাক্যের উদ্দেশ্য হতে পারে। যেমন –

সৎ লোকেরাই প্রকৃত সুখী।	– বিশেষ্যরূপে ব্যবহৃত বিশেষণ।
মিথ্যা কথা বলা খুবই অন্যায়।	– ক্রিয়াজাত বাক্যাংশ।

উদ্দেশ্যের প্রকারভেদ

- একটিমাত্র পদবিশিষ্ট কর্তৃপদকে সরল উদ্দেশ্য বলে।
- উদ্দেশ্যের সঙ্গে বিশেষণাদি যুক্ত থাকলে তাকে সম্প্রসারিত উদ্দেশ্য বলে।

উদ্দেশ্যের সম্প্রসারণ:	সম্প্রসারণ	উদ্দেশ্য	বিধেয়
১. বিশেষণ যোগে—	কুখ্যাত	দস্যুদল	ধরা পড়েছে।
২. সম্বন্ধ পদযোগে—	হাসিমের	ভাই	এসেছে।
৩. সমার্থক বাক্যাংশ যোগে—	যারা অত্যন্ত পরিশ্রমী,	তারাই	উন্নতি করে।
৪. অসমাপিকা ক্রিয়াবিশেষণ যোগে—	চাটুকার পরিবৃত হয়েই	বড় সাহেব	থাকেন।
৫. বিশেষণ স্থানীয় বাক্যাংশ যোগে—	যার কথা তোমরা বলে থাক,	তিনি	এসেছেন।
বিধেয়ের সম্প্রসারণ:	উদ্দেশ্য	সম্প্রসারণ	বিধেয়
১. ক্রিয়া বিশেষণ যোগে—	ঘোড়া	দ্রুত	চলে।
২. ক্রিয়া বিশেষণীয় যোগে—	জেট বিমান	অতিশয় দ্রুত	চলে।
৩. কারকাদি যোগে—	ভুবনের	ঘাটে ঘাটে	ভাসিছে।
৪. ক্রিয়া বিশেষণ স্থানীয় বাক্যাংশ যোগে—	তিনি	যে ভাবেই হোক	আসবেন।
৫. বিধেয় বিশেষণ যোগে—	ইনি	আমার বিশেষ	অন্তরঙ্গ কণ্ঠ (হন)।

গঠন অনুযায়ী বাক্যের প্রকারভেদ

বাক্য তিন প্রকার : (১) সরল বাক্য, (২) মিশ্র বা জটিল বাক্য, (৩) যৌগিক বাক্য।

১. সরল বাক্য : যে বাক্যে একটিমাত্র কর্তা (উদ্দেশ্য) এবং একটিমাত্র সমাপিকা ক্রিয়া (বিধেয়) থাকে, তাকে সরল বাক্য বলে। যথা – পুকুরে পদ্মফুল জন্মে। এখানে ‘পদ্মফুল’ উদ্দেশ্য এবং ‘জন্মে’ বিধেয়।

এ রকম : বৃষ্টি হচ্ছে। তোমরা বাড়ি যাও। খোকা আজ সকালে স্কুলে গিয়েছে। স্নেহময়ী জননী (উদ্দেশ্য) স্বীয় সন্তানকে প্রাণাপেক্ষা ভালোবাসেন (বিধেয়)। বিশ্ববিখ্যাত মহাকবিরা (উদ্দেশ্য) ঐন্দ্রজালিক শক্তিসম্পন্ন লেখনী দ্বারা অমরতার সজ্জীত রচনা করেন (বিধেয়)।

২. মিশ্র বা জটিল বাক্য : যে বাক্যে একটি প্রধান খণ্ডবাক্যের এক বা একাধিক আশ্রিত বাক্য পরস্পর সাপেক্ষ ভাবে ব্যবহৃত হয়, তাকে মিশ্র বা জটিল বাক্য বলে। যথা—

আশ্রিত বাক্য	প্রধান খণ্ডবাক্য
১. যে পরিশ্রম করে,	সে-ই সুখ লাভ করে।
২. সে যে অপরাধ করেছে,	তা মুখ দেখেই বুঝেছি।

আশ্রিত খণ্ডবাক্য তিন প্রকার : (ক) বিশেষ্য স্থানীয় আশ্রিত খণ্ডবাক্য, (খ) বিশেষণ স্থানীয় আশ্রিত খণ্ডবাক্য, (গ) ক্রিয়া বিশেষণ স্থানীয় আশ্রিত খণ্ডবাক্য।

ক. বিশেষ্য স্থানীয় আশ্রিত খণ্ডবাক্য (Noun clause) : যে আশ্রিত খণ্ডবাক্য (Subordinate clause) প্রধান খণ্ডবাক্যের যে কোনো পদের আশ্রিত থেকে বিশেষ্যের কাজ করে, তাকে বিশেষ্যস্থানীয় আশ্রিত খণ্ডবাক্য বলে। যথা :

—আমি মাঠে গিয়ে দেখলাম, খেলা শেষ হয়ে গিয়েছে। (বিশেষ্য স্থানীয় খণ্ডবাক্য ক্রিয়ার কর্মরূপে ব্যবহৃত)

তদুপ : তিনি বাড়ি আছেন কি না, আমি জানি না। ব্যাপারটি নিয়ে ঝাঁটাঝাঁটি করলে ফল ভালো হবে না।

(খ) বিশেষণ স্থানীয় আশ্রিত খণ্ডবাক্য (Adjective clause) : যে আশ্রিত খণ্ডবাক্য প্রধান খণ্ডবাক্যের অন্তর্গত কোনো বিশেষ্য বা সর্বনামের দোষ, গুণ এবং অবস্থা প্রকাশ করে, তাকে বিশেষণ স্থানীয় আশ্রিত খণ্ডবাক্য বলে। যথা :

—লেখাপড়া করে যেই, গাড়ি ঘোড়া চড়ে সেই। (আশ্রিত বাক্যটি ‘সেই’ সর্বনামের অবস্থা প্রকাশ করছে)।

তদুপ : ‘ঋটি সোনার চাইতে ঋটি, আমার দেশের মাটি’।

‘ধনধান্য পুষ্পে ভরা, আমাদের এই বসুন্ধরা।’

যে এ সভায় অনুপস্থিত, সে বড় দুর্ভাগা।

গ) ক্রিয়া-বিশেষণ স্থানীয় খণ্ডবাক্য (Adverbial clause) : যে আশ্রিত খণ্ডবাক্য ক্রিয়াপদের স্থান, কাল ও কারণ নির্দেশক অর্থে ব্যবহৃত হয় তাকে ক্রিয়া-বিশেষণ স্থানীয় আশ্রিত খণ্ডবাক্য বলে। যেমন —

‘যতই করিবে দান, তত যাবে বেড়ে।’

তুমি আসবে বলে আমি অপেক্ষা করছি।

যেখানে আকাশ আর সমুদ্র একাকার হয়ে গেছে, সেখানেই দিকচক্রবাল।

৩. যৌগিক বাক্য : পরস্পর নিরপেক্ষ দুই বা ততোধিক সরল বা মিশ্র বাক্য মিলিত হয়ে একটি সম্পূর্ণ বাক্য গঠন করলে তাকে যৌগিক বাক্য বলে।

জ্ঞাতব্য : যৌগিক বাক্যের অন্তর্গত নিরপেক্ষ বাক্যগুলো এবং, ও, কিন্তু, অথবা, অথচ, কিংবা, বরং, তথাপি প্রভৃতি অব্যয় যোগে সংযুক্ত বা সমন্বিত থাকে। যেমন —

নেতা জনগণকে উৎসাহিত করলেন বটে, কিন্তু, কোনো পথ দেখাতে পারলেন না।

বস্ত্র মলিন কেন, কেহ জিজ্ঞাসা করিলে সে ধোপাকে গালি পাড়ে, অথচ ধৌত বস্ত্রে তাহার গৃহ পরিপূর্ণ।

উদয়াস্ত পরিশ্রম করব, তথাপি অন্যের দ্বারস্থ হব না।

বাক্য রূপান্তর

অর্থের কোনোরূপ রূপান্তর না করে এক প্রকারের বাক্যকে অন্য প্রকার বাক্যে রূপান্তর করার নামই বাক্য রূপান্তর।

ক. সরল বাক্যকে মিশ্র বাক্যে রূপান্তর

সরল বাক্যকে মিশ্র বাক্যে পরিণত করতে হলে সরল বাক্যের কোনো অংশকে খণ্ডবাক্যে পরিণত করতে হয় এবং উভয়ের সংযোগ বিধানে সম্বন্ধসূচক (যদি, তবে, যে, সে প্রভৃতি) পদের সাহায্যে উক্ত খণ্ডবাক্য ও প্রধান বাক্যটিকে পরস্পর সাপেক্ষ করতে হয়। যথা :

১. সরল বাক্য : ভালো ছেলেরা শিক্ষকের আদেশ পালন করে।
মিশ্র বাক্য : যারা ভালো ছেলে, তারা শিক্ষকের আদেশ পালন করে।
২. সরল বাক্য : তার দর্শনমাত্রই আমরা প্রস্থান করলাম।
মিশ্র বাক্য : যে-ই তার দর্শন পেলাম, সে-ই আমরা প্রস্থান করলাম।
৩. সরল বাক্য : ভিক্ষুককে দান কর।
মিশ্র বাক্য : যে ভিক্ষা চায়, তাকে দান কর।

খ. মিশ্র বাক্যকে সরল বাক্যে রূপান্তর : মিশ্র বাক্যকে সরল বাক্যে রূপান্তর করতে হলে মিশ্র বাক্যের অপ্রধান খণ্ডবাক্যটিকে সংকুচিত করে একটি পদ বা একটি বাক্যাংশে পরিণত করতে হয়। যথা :

১. মিশ্র বাক্য : যাদের বুদ্ধি নেই, তারাই এ কথা বিশ্বাস করবে।
সরল বাক্য : নির্বোধরা/বুদ্ধিহীনরা এ কথা বিশ্বাস করবে।
২. মিশ্র বাক্য : যতদিন জীবিত থাকব, ততদিন এ ঋণ স্বীকার করব।
সরল বাক্য : আজীবন এ ঋণ স্বীকার করব।
৩. মিশ্র বাক্য : যে সকল পশু মাংস ভোজন করে, তারা অত্যন্ত বলবান।
সরল বাক্য : মাংসভোজী পশু অত্যন্ত বলবান।

গ. সরল বাক্যকে যৌগিক বাক্যে রূপান্তর

সরল বাক্যকে যৌগিক বাক্যে পরিণত করতে হলে সরল বাক্যের কোনো অংশকে নিরপেক্ষ বাক্যে রূপান্তর করতে হয়। এবং যথাসম্ভব সংযোজক বা বিয়োজক অব্যয়ের প্রয়োগ করতে হয়। যেমন –

১. সরল বাক্য : তিনি আমাকে পাঁচ টাকা দিয়ে বাড়ি যেতে বললেন।
যৌগিক বাক্য : তিনি আমাকে পাঁচটি টাকা দিলেন এবং বাড়ি যেতে বললেন।
২. সরল বাক্য : পরীক্ষায় উত্তীর্ণ হওয়ার জন্য এখন থেকেই তোমার পড়া উচিত।
যৌগিক বাক্য : এখন থেকেই তোমার পড়া উচিত, তবেই পরীক্ষায় উত্তীর্ণ হতে পারবে।
৩. সরল বাক্য : আমি বহু কষ্টে শিক্ষা লাভ করেছি।
যৌগিক বাক্য : আমি বহু কষ্ট করেছি, ফলে শিক্ষা লাভ করেছি।

ঘ. যৌগিক বাক্যকে সরল বাক্যে রূপান্তর করতে হলে

- (১) বাক্যসমূহের একটি সমাপিকা ক্রিয়াকে অপরিবর্তিত রাখতে হয়।
- (২) অন্যান্য সমাপিকা ক্রিয়াকে অসমাপিকা ক্রিয়ায় পরিণত করতে হয়।
- (৩) অব্যয় পদ থাকলে তা বর্জন করতে হয়।
- (৪) কোনো কোনো স্থলে একটি বাক্যকে হেতুবোধক বাক্যাংশে পরিণত করতে হয়। যথা :

- | | | |
|-----------------|---|---------------------------------------|
| (১) যৌগিক বাক্য | : | সত্য কথা বলিনি, তাই বিপদে পড়েছি। |
| সরল বাক্য | : | সত্য কথা না বলে বিপদে পড়েছি। |
| (২) যৌগিক বাক্য | : | তার বয়স হয়েছে, কিন্তু বুদ্ধি হয়নি। |
| সরল বাক্য | : | তার বয়স হলেও বুদ্ধি হয়নি। |
| (৩) যৌগিক বাক্য | : | মেঘ গর্জন করে, তবে ময়ূর নৃত্য করে। |
| সরল বাক্য | : | মেঘ গর্জন করলে ময়ূর নৃত্য করে। |

ঙ. যৌগিক বাক্যকে মিশ্র বাক্যে রূপান্তর

যৌগিক বাক্যের অন্তর্গত পরস্পর নিরপেক্ষ বাক্য দুটির প্রথমটির পূর্বে ‘যদি’ কিংবা ‘যদিও’ এবং দ্বিতীয়টির পূর্বে ‘তাহলে’ (তাহা হইলে) কিংবা ‘তথাপি’ অব্যয়গুলো ব্যবহার করতে হয়। যেমন –

- | | | |
|-----------------|---|---|
| (১) যৌগিক বাক্য | : | দোষ স্বীকার কর, তোমাকে কোনো শাস্তি দেব না। |
| মিশ্র বাক্য | : | যদি দোষ স্বীকার কর, তাহলে তোমাকে কোনো শাস্তি দেব না। |
| (২) যৌগিক বাক্য | : | তিনি অত্যন্ত দরিদ্র কিন্তু তাঁর অসুঃকরণ অতিশয় উচ্চ। |
| মিশ্র বাক্য | : | যদিও তিনি অত্যন্ত দরিদ্র, তথাপি তাঁর অসুঃকরণ অতিশয় উচ্চ। |

সাপেক্ষ অব্যয়ের সাহায্যেও যৌগিক বাক্যকে মিশ্র বাক্যে পরিবর্তন করা যায়। যথা :

- | | | |
|-------------|---|---|
| যৌগিক বাক্য | : | এ গ্রামে একটি দরগাহ আছে, সেটি পাঠানযুগে নির্মিত হয়েছে। |
| মিশ্র বাক্য | : | এ গ্রামে যে দরগাহ আছে, সেটি পাঠানযুগে নির্মিত হয়েছে। |

চ. মিশ্রবাক্যকে যৌগিক বাক্যে রূপান্তর

মিশ্র বাক্যকে যৌগিক বাক্যে পরিবর্তন করতে হলে খণ্ডবাক্যগুলোকে এক একটি স্বাধীন বাক্যে পরিবর্তন করে তাদের মধ্যে সংযোজক অব্যয়ের ব্যবহার করতে হয়। যেমন –

- | | | |
|-----------------|---|---|
| (১) মিশ্র বাক্য | : | যদি সে কাল আসে, তাহলে আমি যাব। |
| যৌগিক বাক্য | : | সে কাল আসবে এবং আমি যাব। |
| (২) মিশ্র বাক্য | : | যখন বিপদ আসে, তখন দুঃখও আসে। |
| যৌগিক বাক্য | : | বিপদ এবং দুঃখ এক সময়ে আসে। |
| (৩) মিশ্র বাক্য | : | যদিও তাঁর টাকা আছে, তথাপি তিনি দান করেন না। |
| যৌগিক বাক্য | : | তাঁর টাকা আছে, কিন্তু তিনি দান করেন না। |

বাক্য বিশ্লেষণ

সংজ্ঞা : বাক্যের বিভিন্ন অংশ পৃথক করে তাদের পারস্পরিক সম্বন্ধ নির্ণয় প্রণালীকে বাক্য বিশ্লেষণ বলে।

ক. সরল বাক্যের বিশ্লেষণ

১. মহারাজ শুম্ভাধনের পুত্র শাক্যসিংহ যৌবনে সংসার ত্যাগ করেন।

২. ইসলামের প্রথম খলিফা হজরত আবু বকর (রা) দীন ইসলামের জন্য তাঁর যথাসর্বস্ব দান করেছিলেন।

ওপরে লিখিত বাক্য দুটিকে (১) উদ্দেশ্য, (২) উদ্দেশ্যের সম্প্রসারক, (৩) বিধেয়, (৪) বিধেয়ের সম্প্রসারক – এ চারটি অংশে বিশ্লেষণ করতে হবে।

বিশ্লেষণ

উদ্দেশ্যের সম্প্রসারক	উদ্দেশ্য	বিধেয়ের সম্প্রসারক	বিধেয়
(১) মহারাজ শুম্ভাধনের পুত্র	শাক্যসিংহ	যৌবনে সংসার	ত্যাগ করেন।
(২) ইসলামের প্রথম খলিফা	হযরত আবু বকর (রা)	দীন ইসলামের জন্য তাঁর যথাসর্বস্ব	দান করেছিলেন।

খ. মিশ্র বাক্যের বিশ্লেষণ

মিশ্র বাক্যের বিশ্লেষণ করতে হলে

১. প্রথমে প্রধান বাক্যটি প্রদর্শন করতে হয়।

২. খণ্ডবাক্য (গুলো) প্রদর্শন করে তাদের সঙ্গে প্রধান বাক্যের সম্বন্ধ উল্লেখ করতে হয়।

৩. প্রধান এবং অপ্রধান খণ্ডবাক্যের মধ্যে কোনো সংযোজক পদ থাকলে তাও দেখাতে হয়। যেমন—আমি স্থির করলাম যে, এরূপ অল্প বয়স্ক বালককে পাঠাব না। এখানে প্রধান বাক্য—(১) আমি স্থির করলাম; সংযোজক পদ—যে; বিশেষ্য—স্থানীয় খণ্ডবাক্য – (২) অল্প বয়স্ক বালককে পাঠাব না।

বিশ্লেষণ

উদ্দেশ্যের সম্প্রসারক	উদ্দেশ্য	বিধেয়ের সম্প্রসারক	বিধেয়	সংযোজক বা সাপেক্ষ অব্যয়
(১)	আমি	অল্প বয়স্ক বালককে	স্থির করলাম	যে
(২)	(আমি) (উহ্য)		পাঠাব না।	এবং

গ. যৌগিক বাক্যের বিশ্লেষণ

যৌগিক বাক্যের বিশ্লেষণ করতে হলে

১. প্রত্যেকটি স্বাধীন বা নিরপেক্ষ বাক্যকে সরল বাক্যের ন্যায় বিশ্লেষণ করতে হবে।
২. কোনো সংযোজক অব্যয় থাকলে তা প্রদর্শন করতে হবে। যেমন – ত্যাগ এবং জ্ঞান মানুষকে মুক্তির পথে পরিচালিত করে। এখানে দুটি বাক্য আছে। যেমন –
 - (১) ত্যাগ মানুষকে মুক্তির পথে পরিচালিত করে।
 - (২) জ্ঞান মানুষকে মুক্তির পথে পরিচালিত করে। বাক্য দুটির সংযোজক অব্যয় ‘এবং’।

বিশ্লেষণ

উদ্দেশ্যের সম্প্রসারক	উদ্দেশ্য	বিধেয়ের সম্প্রসারক	বিধেয়	সংযোজক অব্যয়
(১)	ত্যাগ	মানুষকে মুক্তির পথে	পরিচালিত করে	এবং
(২)	জ্ঞান	মানুষকে মুক্তির পথে	পরিচালিত করে	

বাক্য সংক্ষেপণ

একাধিক পদ বা উপবাক্যকে একটি শব্দে প্রকাশ করা হলে, তাকে বাক্য সংক্ষেপণ বলে। এটি বাক্য সংকোচন বা এক কথায় প্রকাশেরই নামান্তর। এখানে বাক্য সংকোচনের উদাহরণ দেওয়া গেল।

বাক্য সংক্ষেপণের বা বাক্য সংকোচনের উদাহরণ

- অকালে পক্ব হয়েছে যা – অকালপক্ব।
 অক্ষির সমক্ষে বর্তমান – প্রত্যক্ষ।
 অভিজ্ঞতার অভাব আছে যার – অনভিজ্ঞ।
 অহংকার নেই যার – নিরহংকার।
 অনেকের মধ্যে একজন – অন্যতম।
 অনুতে (বা পশ্চাতে) জন্মেছে যে – অনুজ।
 আদি থেকে অন্ত পর্যন্ত – আদ্যন্ত, আদ্যোপান্ত।
 আকাশে বেড়ায় যে – আকাশচারী, খেচর।
 আচারে নিষ্ঠা আছে যার – আচারনিষ্ঠ।
 আপনাকে কেন্দ্র করে যার চিন্তা – আত্মকেন্দ্রিক।
 আপনাকে যে পণ্ডিত মনে করে – পণ্ডিতম্ভন্য।
 আল্লাহর অস্তিত্বে বিশ্বাস আছে যার – আস্তিক।

আল্লাহর অস্তিত্বে বিশ্বাস নেই যার – নাস্তিক।
 ইতিহাস রচনা করেন যিনি – ঐতিহাসিক।
 ইতিহাস বিষয়ে অভিজ্ঞ যিনি – ইতিহাসবেত্তা।
 ইন্দ্রিয়কে জয় করেছে যে – জিতেন্দ্রিয়।
 ঈষৎ আমিষ (আঁষ) গন্ধ যার – আঁষটে।
 উপকারীর উপকার যে স্বীকার করে – কৃতজ্ঞ।
 উপকারীর উপকার যে স্বীকার করে না – অকৃতজ্ঞ।
 উপকারীর অপকার করে যে – কৃতঘ্ন।
 একই মাতার উদরে জাত যে –সহোদর।
 এক থেকে শুরু করে ক্রমাগত – একাদিক্রমে।
 কর্ম সম্পাদনে পরিশ্রমী – কর্মঠ।
 কোনো ভাবেই যা নিবারণ করা যায় না – অনিবার্য।
 চক্ষুর সম্মুখে সংঘটিত –চাক্ষুষ।
 জীবিত থেকেও যে মৃত – জীবন্মৃত।
 তল স্পর্শ করা যায় না যার – অতলস্পর্শী।
 দিনে যে একবার আহার করে – একাহারী।
 নষ্ট হওয়াই স্বভাব যার – নশ্বর।
 নদী মেখলা যে দেশের – নদীমেখলা।
 নৌকা দ্বারা জীবিকা নির্বাহ করে যে – নাবিক।
 পা থেকে মাথা পর্যন্ত – আপাদমস্তক।
 ফল পাকলে যে গাছ মরে যায় – ওষধি।
 বিদেশে থাকে যে – প্রবাসী।
 বিশ্বজনের হিতকর – বিশ্বজনীন।
 মৃতের মতো অবস্থা যার – মুমূর্ষু।
 যা দমন করা যায় না – অদম্য।
 যা দমন করা কষ্টকর – দুর্দমনীয়।
 যা নিবারণ করা কষ্টকর – দুর্নিবার।
 যা পূর্বে ছিল এখন নেই – ভূতপূর্ব।
 যার উপস্থিত বুদ্ধি আছে – প্রত্যুৎপন্নমতি।

যার সর্বস্ব হারিয়ে গেছে – সর্বহারা, হৃতসর্বস্ব।
 যার কোনো কিছু থেকেই ভয় নেই – অকুতোভয়।
 যার আকার কুৎসিত – কদাকার।
 যা বিনা যত্নে লাভ করা গিয়েছে – অযত্নলব্ধ।
 যা বার বার দুঃলছে – দোদুল্যমান।
 যা দীপ্তি পাচ্ছে – দেদীপ্যমান।
 যা সাধারণের মধ্যে দেখা যায় না এমন – অনন্যসাধারণ।
 যা পূর্বে দেখা যায়নি এমন – অদৃষ্টপূর্ব।
 যা কষ্টে জয় করা যায় – দুর্জয়।
 যা কষ্টে লাভ করা যায় – দুর্লভ।
 যা অধ্যয়ন করা হয়েছে – অধীত।
 যা জলে চরে – জলচর।
 যা স্থলে চরে – স্থলচর।
 যা জলে ও স্থলে চরে – উভচর।
 যা বলা হয়নি – অনুক্ত।
 যা কখনো নষ্ট হয় না – অবিনশ্বর।
 যা মর্ম স্পর্শ করে – মর্মস্পর্শী।
 যা বলার যোগ্য নয় – অকথ্য।
 যা অতি দীর্ঘ নয় – নাতিদীর্ঘ।
 যার বংশ পরিচয় এবং স্বভাব কেউই জানে না – অজ্ঞাতকুলশীল।
 যার প্রকৃত বর্ণ ধরা যায় না – বর্ণচোরা।
 যা চিন্তা করা যায় না – অচিন্তনীয়, অচিন্ত্য।
 যা কোথাও উঁচু কোথাও নিচু – বন্ধুর।
 যা সম্পন্ন করতে বহু ব্যয় হয় – ব্যয়বহুল।
 যা খুব শীতল বা উষ্ণ নয় – নাতিশীতোষ্ণ।
 যার বিশেষ খ্যাতি আছে – বিখ্যাত।
 যা আঘাত পায়নি – অনাহত।
 যা উদিত হচ্ছে – উদীয়মান।
 যার অন্য উপায় নেই – অনন্যোপায়।
 যার কোনো উপায় নেই – নিরুপায়।

যা ক্রমশ বর্ধিত হচ্ছে- বর্ধিষ্ণু।
 যা পূর্বে শোনা যায়নি - অশ্রুতপূর্ব।
 যে শূন্যেই মনে রাখতে পারে - শ্রুতিধর।
 যে বাস্তু থেকে উৎখাত হয়েছে - উদ্বাস্তু।
 যে নারী নিজে বর বরণ করে নেয় - স্বয়ংবরা।
 যে গাছে ফল ধরে, কিন্তু ফুল ধরে না - বনস্পতি।
 যে রোগ নির্ণয় করতে হাতড়ে মরে - হাতুড়ে।
 যে নারীর সন্তান বাঁচে না - মৃতবৎসা।
 যে গাছ কোনো কাজে লাগে না - আগাছা।
 যে গাছ অন্য গাছকে আশ্রয় করে বাঁচে - পরগাছা।
 যে পুরুষ বিয়ে করেছে - কৃতদার।
 যে মেয়ের বিয়ে হয়নি - অনুঢ়া।
 যে ক্রমাগত রোদন করছে - রোরুদ্যমান।
 যে ভবিষ্যতের চিন্তা করে না বা দেখে না- অপরিণামদর্শী।
 যে ভবিষ্যৎ না ভেবেই কাজ করে - অবিমূষ্যকারী।
 যে বিষয়ে কোনো বিতর্ক (বা বিসংবাদ) নেই - অবিসংবাদিত।
 যে বন হিংস্র জন্তুতে পরিপূর্ণ - স্থাপদসংকুল।
 যিনি বক্তৃতা দানে পটু - বাগ্মী।
 যে সকল অত্যাচারই সয়ে যায় - সর্বংসহ।
 যে নারী বীর সন্তান প্রসব করে - বীরপ্রসূ।
 যে নারীর কোনো সন্তান হয় না - বন্ধ্যা।
 যে নারী জীবনে একমাত্র সন্তান প্রসব করেছে - কাকবন্ধ্যা।
 যে পুরুষের চেহারা দেখতে সুন্দর - সুদর্শন।
 যে রব শূন্যে এসেছে - রবাহুত।
 লাভ করার ইচ্ছা - লিপ্সা।
 শূন্য ক্ষণে জন্ম যার - ক্ষণজন্মা।
 সম্মুখে অগ্রসর হয়ে অভ্যর্থনা - প্রত্যুদগমন।
 সকলের জন্য প্রযোজ্য - সর্বজনীন।
 হনন করার ইচ্ছা - জিঘাংসা।

অনুশীলনী

১। প্রত্যেক প্রশ্নের চারটি উত্তরের সর্বোত্তমটিতে টিক (✓) চিহ্ন দাও :

(১) ভাষার মূল উপকরণ কী?

ক. ধ্বনি

গ. বাক্য

খ. শব্দ

ঘ. বর্ণ

(২) বাক্যে এক পদের পর অন্য পদ শোনার ইচ্ছাকে কী বলে?

ক. আসক্তি

গ. আকাঙ্ক্ষা

খ. যোগ্যতা

ঘ. আসক্তি

(৩) ‘শবপোড়া’ শব্দটিতে কী দোষ দেখা যায়?

ক. গুরুচড়ালী

গ. আকাঙ্ক্ষার ভুল প্রয়োগ

খ. উপমা প্রয়োগে ভুল

ঘ. দুর্বোধ্যতা

(৪) কোনটি বাগধারার শব্দ পরিবর্তনজনিত ভুলের উদাহরণ?

ক. ঘোড়ার ডিম

গ. গৌরীসেনের টাকা

খ. গোড়ায় গলদ

ঘ. ঘোটকের ডিম্ব

(৫) কোন বাক্যাংশটি গুরুচড়ালী দোষযুক্ত?

ক. ঘোড়ার গাড়ি

গ. শবদাহ

খ. ঘোটকের গাড়ি

ঘ. মড়াপোড়া

(৬) উপকারীর উপকার স্বীকার করে যে-এর সর্থক্ষিপ্ত রূপ কোনটি?

ক. উপকার-স্বীকারী

গ. কৃতজ্ঞ

খ. অকৃতজ্ঞ

ঘ. কৃতজ্ঞ

(৭) নষ্ট হওয়া স্বভাব যার –এক কথায় কী হবে?

ক. অবিনশ্বর

গ. নষ্টস্বভাব

খ. নশ্বর

ঘ. বিনষ্ট

(৮) যা পূর্বে দেখা যায়নি – এক কথায় কী হবে?

ক. অদৃষ্ট

গ. অপূর্ব

খ. দৃষ্টপূর্ব

ঘ. অদৃষ্টপূর্ব

- ২। বাক্য বলতে কী বোঝ? কোনো একটি সার্থক বাক্য গঠনে কী কী গুণ বা বৈশিষ্ট্য থাকা আবশ্যিক? সংক্ষেপে বুঝিয়ে লেখ।
- ৩। ‘শব্দের যোগ্যতা বিচার রীতিমত কঠিন কাজ, কেননা শব্দের যোগ্যতার সঙ্গে অনেক বিষয় জড়িত থাকে।’ –এ উক্তিটির সমর্থনে তোমার বক্তব্য লিপিবদ্ধ কর।
- ৪। কী কী উপায়ে বিধেয়ের সম্প্রসারণ হতে পারে? স্বরচিত বাক্যে উপায়সমূহের উদাহরণ দাও।
- ৫। সংজ্ঞা লেখ এবং উদাহরণ দাও :
- (ক) মিশ্রবাক্য, (খ) আশ্রিত খণ্ডবাক্য, (গ) বিশেষণ স্থানীয় খণ্ডবাক্য, (ঘ) ক্রিয়া-বিশেষণ স্থানীয় খণ্ডবাক্য
- ৬। যৌগিক বাক্য ও সরল বাক্যের মধ্যে সম্পর্ক কী? উদাহরণযোগে বুঝিয়ে দাও।
- ৭। নিম্নলিখিত বাক্যগুলোকে নির্দেশিত বন্ধনীয়ুক্ত বাক্যে রূপান্তর কর
- (ক) সত্য কথা বল নি, সুতরাং বিপদে পড়েছ। (সরল বাক্যে)
- (খ) অপরাধ স্বীকার কর, তোমাকে কোনো শাস্তি দেব না। (মিশ্র বাক্যে)
- (গ) যদিও তাঁর টাকা আছে, তথাপি তিনি দান করেন না। (যৌগিক বাক্যে)
- (ঘ) যখন দুর্দিন আসে তখন দুঃখও আসে। (যৌগিক বাক্যে)
- (ঙ) যে ভিক্ষা করতে এসেছে, তাকে ভিক্ষা দাও। (সরল বাক্যে)
- (চ) তাকে দেখা মাত্রই আমরা চলে গেলাম। (মিশ্র বাক্যে)
- ৮। নিম্নলিখিত বাক্য তিনটি বিশ্লেষণ কর :
- (ক) যাঁরা সত্যিকার কর্মী, তাঁরাই জীবনযুদ্ধে জয়ী হন।
- (খ) মানব-সেবায় আত্মোৎসর্গ কর।
- (গ) পথিক বিবেচনা করলেন যে, পথচারী মহিলাটি ঝড়-বৃষ্টির মধ্যে বিপদে পড়েছেন।
- ৯। বাক্য সংক্ষেপণ বলতে কী বোঝ? কী কী উপায়ে বাক্যাংশের সংক্ষেপণ হতে পারে? উদাহরণসহ বিশদ আলোচনা কর।
- ১০। ঠিক উত্তরটিতে টিক (✓) চিহ্ন দাও :
- (ক) আকাশে চরে বেড়ায় যে : আকাশচারী/চিল/খেচর।
- (খ) যে উপকারীর অপকার করে : অপকারক/কৃতঘ্ন/অকৃতজ্ঞ।
- (গ) যা দমন করা যায় না : দুর্দম/দুর্দমনীয়/ অদম্য।
- (ঘ) যা দীপ্তি পাচ্ছে : সন্দীপন/দীপ্তিমান/দেদীপ্যমান।

- (ঙ) যা বলা হয়নি : অকথিত/অনুকৃত/অবাচ্য।
 (চ) যার কোনো উপায় নেই : নাচার/অনুপায়/নিরুপায়।
 (ছ) হনন করার ইচ্ছা : হননেচ্ছা/জিঘাংসা/জিজ্ঞাসা।

১১। এক শব্দে পরিণত কর এবং ঐ শব্দ দ্বারা সার্থক বাক্য রচনা কর :

- (ক) সকলের দ্বারা অনুষ্ঠিত।
 (খ) লাভ করার ইচ্ছা।
 (গ) যে ক্রমাগত কাঁদছে।
 (ঘ) যে বিষয়ে কোনো বিতর্ক নেই।
 (ঙ) যা বলার যোগ্য নয়।
 (চ) যার স্বাভাবিক বর্ণ ধরা যায় না।
 (ছ) যার আকার কুৎসিত।
 (জ) যে গাছ অন্য গাছের ওপর নির্ভর করে বাঁচে।
 (ঝ) যা আঘাত পায়নি।
 (ঞ) যে বাস্তু থেকে উৎখাত হয়েছে।

বিশেষ্য শব্দের প্রয়োগভেদে অর্থ পার্থক্য

১. হাত

- (ক) হাত আসা — কাজ করতে করতেই কাজে হাত আসবে। (দক্ষতা)
 (খ) হাত গুটান — হাত গুটিয়ে বসে আছ কেন? (কার্যে বিরতি)
 (গ) হাত করা — সাহেবকে হাত করতে পারলেই কাজ হবে। (আয়ত্তে আনা)
 (ঘ) হাত ছাড়া — টাকাগুলো হাত ছাড়া করো না। (হস্তচ্যুত)
 (ঙ) হাত থাকা — এ ব্যাপারে আমার কোনো হাত নেই। (প্রভাব)

দ্রষ্টব্য : বাগ্‌ধারা গঠনে বিভিন্ন পদের ব্যবহারকে রীতিসিদ্ধ প্রয়োগও বলে।

‘হাত’ শব্দের রীতিসিদ্ধ প্রয়োগ

- (ক) হাতের পঁচ (শেষ সম্বল) : এ টাকা কটিই ছিল আমার হাতের পঁচ।
 (খ) হাতে হাতে (অবিলম্বে) : হাতে হাতে এ কাজের ফল পাবেন।
 (গ) হাতে খড়ি (বিদ্যারম্ভ) : এ মাসেই খোকার হাতে খড়ি হবে।
 (ঘ) হাতে কলমে (স্বহস্তে, কার্যকর ভাবে) : হাতে-কলমে শিক্ষা কেতাবি শিক্ষার চেয়ে দীর্ঘস্থায়ী।

২. মাথা

- (ক) মাথা ধরা — রোগ বিশেষ (খ) গায়ের মাথা — মোড়ল।
 (গ) মাথা ব্যথা — আগ্রহ (ঘ) মাথা খাওয়া — শপথ করা।
 (ঙ) মাথা দেওয়া — দায়িত্ব গ্রহণ (চ) মাথা ঘামানো — ভাবনা করা।
 (ছ) মাথাপিছু — জনপ্রতি

মাথা শব্দের রীতিসিদ্ধ প্রয়োগ

- রাস্তার মাথায় — মিলন স্থলে।
 মাথা গরম করা — রাগান্বিত হওয়া।
 রাগের মাথায় — হঠাৎ ক্রোধবশত।
 মাথা হেঁট করা — লজ্জায় মাথা নিচু করা।
 মাথা উচু করে চলা — গর্বভরে চলা।

বাক্য গঠন

- রাস্তার মাথায় তার সঙ্গে দেখা।
 রাগের মাথায় কথাটা বলেছি।
 মাথা গরম করে আর কী হবে?
 মাথা হেঁট হবে কেন?
 মাথা উচু করেই চলতে চাই।

বিশেষ্য শব্দের প্রয়োগভেদে অর্থ পার্থক্য

১. হাত

- (ক) হাত আসা — কাজ করতে করতেই কাজে হাত আসবে। (দক্ষতা)
 (খ) হাত গুটান — হাত গুটিয়ে বসে আছ কেন? (কার্যে বিরতি)
 (গ) হাত করা — সাহেবকে হাত করতে পারলেই কাজ হবে। (আয়ত্তে আনা)
 (ঘ) হাত ছাড়া — টাকাগুলো হাত ছাড়া করো না। (হস্তচ্যুত)
 (ঙ) হাত থাকা — এ ব্যাপারে আমার কোনো হাত নেই। (প্রভাব)

দ্রষ্টব্য : বাগ্‌ধারা গঠনে বিভিন্ন পদের ব্যবহারকে রীতিসিদ্ধ প্রয়োগও বলে।

‘হাত’ শব্দের রীতিসিদ্ধ প্রয়োগ

- (ক) হাতের পঁচ (শেষ সম্বল) : এ টাকা কটিই ছিল আমার হাতের পঁচ।
 (খ) হাতে হাতে (অবিলম্বে) : হাতে হাতে এ কাজের ফল পাবেন।
 (গ) হাতে খড়ি (বিদ্যারম্ভ) : এ মাসেই খোকার হাতে খড়ি হবে।
 (ঘ) হাতে কলমে (স্বহস্তে, কার্যকর ভাবে) : হাতে-কলমে শিক্ষা কেতাবি শিক্ষার চেয়ে দীর্ঘস্থায়ী।

২. মাথা

- (ক) মাথা ধরা — রোগ বিশেষ (খ) গায়ের মাথা — মোড়ল।
 (গ) মাথা ব্যথা — আগ্রহ (ঘ) মাথা খাওয়া — শপথ করা।
 (ঙ) মাথা দেওয়া — দায়িত্ব গ্রহণ (চ) মাথা ঘামানো — ভাবনা করা।
 (ছ) মাথাপিছু — জনপ্রতি

মাথা শব্দের রীতিসিদ্ধ প্রয়োগ

- রাস্তার মাথায় — মিলন স্থলে।
 মাথা গরম করা — রাগান্বিত হওয়া।
 রাগের মাথায় — হঠাৎ ক্রোধবশত।
 মাথা হেঁট করা — লজ্জায় মাথা নিচু করা।
 মাথা উচু করে চলা — গর্বভরে চলা।

বাক্য গঠন

- রাস্তার মাথায় তার সঙ্গে দেখা।
 রাগের মাথায় কথাটা বলেছি।
 মাথা গরম করে আর কী হবে?
 মাথা হেঁট হবে কেন?
 মাথা উচু করেই চলতে চাই।

বিশেষণ শব্দের রীতিসিদ্ধ প্রয়োগ

১. কাঁচা

কাঁচা আম	—	অপরিপক্ব আম।	কাঁচা খাতা	—	খসড়া।
কাঁচা কথা	—	গুরুত্বহীন কথা।	কাঁচা ইট	—	অদগ্ধ ইট।
কাঁচা ঘুম	—	অল্প ক্ষণের ঘুম।	কাঁচা চুল	—	কালো চুল।
কাঁচা বয়স	—	অপরিণত বয়স।	কাঁচা সোনা	—	নিখাদ স্বর্ণ।

বাক্য গঠন : কাঁচা সোনার মতো তার গায়ের রং।

কাঁচা (আনাড়ি) লোকই কাঁচা (অনিপুণভাবে) কাজ করে থাকে।

বাক্যে ‘পাকা’ বিশেষণ শব্দের রীতিসিদ্ধ প্রয়োগ

- পাকা কথা (শেষ সিদ্ধান্তসূচক) চাই।
- পাকা বন্দোবস্ত (স্থায়ী) করে এসেছি।
- এ হচ্ছে পাকা রাঁধুনির (দক্ষ) রান্না।
- ইঁচড়ে পাকা (অকালে পরিপক্ব) ছেলেদের কথা অসহ্য।
- একেবারে পাকা হাতের (দক্ষ লেখকের) লেখা।

আমি কি তোমার পাকা ধানে মই দিয়েছি (হক নষ্ট করা) যে, আমার সঙ্গে শত্রুতা করছ?

‘করা’ ক্রিয়াপদের রীতিসিদ্ধ প্রয়োগ

- মনে করলাম এবার তীর্থে যাব। (সংকল্প করা)
- সে ফুটবল খেলায় নাম করেছে। (যশস্বী হওয়া)
- টাকা করে নাম কিনতে চাও? (খ্যাতি লাভের চেষ্টা করা)
- চাকরি পাওয়ার কোনো জো করে উঠতে পারিনি। (সুযোগ পাওয়া)

‘ধরা’ ক্রিয়াপদের রীতিসিদ্ধ প্রয়োগ

কান ধরা	—	কর্ণ মর্দন করা।	মনে ধরা	—	পছন্দ হওয়া।
দোষ ধরা	—	অপরাধ গণনা করা।	আগুন ধরা	—	আগুন লাগা।
পথ ধরা	—	উপায় দেখা।	ম্যাও ধরা	—	দায়িত্ব নেওয়া।
হাতে-পায়ে ধরা	—	অনুরোধ করা।	গৌ ধরা	—	একগুঁয়েমি করা।
গলা ধরা	—	কণ্ঠ বৃন্দ হওয়া। (কথা কন্ধ হয়ে যাওয়া)			

দ্রষ্টব্য : শব্দাত্মক ও পদাত্মক বাগ্‌ধারার অর্থের পার্থক্য ঘটে। যেমন—

{ গা সওয়া	— অভ্যস্ত হওয়া	{ গা লাগা	— মনোযোগ দেওয়া।
{ গায়ে সওয়া	— দেহে সহ্য হওয়া।	{ গায়ে লাগা	— অনুভূত হওয়া।
{ পায়ে পড়া	— ক্ষমা প্রার্থনা করা।	{ হাত আসা	— অভ্যস্ত হওয়া।
{ পায়ে পড়া	— খোশামুদে।	{ হাতে আসা	— আয়ত্ত হওয়া।
{ রোগ ধরা	— রোগ নির্ণয়।		
{ রোগ ধরা	— রোগাক্রান্ত হওয়া।		

বাগ্‌ধারার ব্যবহার

অকাল কুম্ভাণ্ড (অপদার্থ, অকেজো)	— অকাল কুম্ভাণ্ড ছেলেটার ওপর এ কাজের দায়িত্ব দিও না।
অক্কা পাওয়া (মারা যাওয়া)	— অনেক রোগভোগের পর শয়তানটা শেষ পর্যন্ত অক্কা পেয়েছে।
অগস্ত্য যাত্রা (চিরদিনের জন্য প্রস্থান)	— ডাকাতি মামলার আসামি হওয়ায় করিম গ্রাম থেকে অগস্ত্য যাত্রা করেছে।
অগাধ জলের মাছ (সুচতুর ব্যক্তি)	— সরল মনে হলেও লোকটা আসলে অগাধ জলের মাছ।
অর্ধচন্দ্র (গলা ধাক্কা)	— শয়তানটাকে অর্ধচন্দ্র দিয়ে বিদায় করে দাও।
অশ্বেশ্বর যষ্টি } (একমাত্র অবলম্বন)	— বিধবার একমাত্র সন্তান তার অশ্বেশ্বর যষ্টি/অশ্বেশ্বর নড়ি।
অশ্বেশ্বর নড়ি }	
অগ্নিশর্মা (নিরতিশয় ক্রুদ্ধ)	— তিনি ক্রোধে অগ্নিশর্মা হলেন।
অগ্নিপরীক্ষা (কঠিন পরীক্ষা)	— জাতিকে এ অগ্নিপরীক্ষায় উত্তীর্ণ হতেই হবে, ভয় পেলে চলবে না।
অশ্বকারে টিল মারা (আন্দাজে কাজ করা)	— অশ্বকারে টিল মেরে সব কাজ ঠিকভাবে করা যায় না।
অকূল পাথার (ভীষণ বিপদ)	— অকূল পাথারে আল্লাহ্‌ই একমাত্র সহায়।
অনুরোধে টেকি গেলা (অনুরোধে দুরূহ কাজ সম্পন্ন করতে সম্মতি জ্ঞাপন)	— অনুরোধে টেকি গেলা আমার পক্ষে সম্ভব নয়, আমি এ কাজ করতে পারব না।
অদৃষ্টের পরিহাস (ভাগ্যের নিষ্ঠুরতা)	— অদৃষ্টের পরিহাসে রাজাও ভিখারি হয়।
অল্পবিদ্যা ভয়ংকরী (সামান্য বিদ্যার অহংকার)	— কিছুই জানে না, আবার দেমাক কত — অল্পবিদ্যা ভয়ংকরী আর কি।
অনধিকার চর্চা (সীমার বাইরে পদক্ষেপ)	— কারও ব্যক্তিগত বিষয় নিয়ে আমি অনধিকার চর্চা করি না।
অরণ্যে রোদন (নিষ্ফল আবেদন)	— কৃপণের নিকট চাঁদা চাওয়া অরণ্যে রোদন মাত্র।
অহিনকুল সম্বন্ধ (ভীষণ শত্রুতা)	— দুভাইয়ের মধ্যে অহিনকুল সম্বন্ধ দাঁড়িয়েছে।

- অন্ধকার দেখা (দিশেহারা হয়ে পড়া) – এ বিপদে আমি যে সব অন্ধকার দেখছি।
- অমাবস্যার চাঁদ (দুর্লভ বস্তু) – তোমার দেখা পাওয়াই ভার, অমাবস্যার চাঁদ হয়ে পড়েছে।
- আকাশ কুসুম (অসম্ভব কল্পনা) – মূর্খরাই আকাশ কুসুম চিন্তা করে।
- আকাশ পাতাল (প্রচুর ব্যবধান) – ধনী ও দরিদ্রের মধ্যে আকাশ পাতাল প্রভেদ।
- আক্কেল সেলামি (নির্বুস্থিতার দণ্ড) – বিনা টিকেটে রেলগাড়িতে চড়ে আক্কেল সেলামি দিতে হলো।
- আঙুল ফুলে কলাগাছ (হঠাৎ বড়লোক) – যুগ্মের বাজারে দেদার টাকা পয়সা কামাই করে অনেকেই আঙুল ফুলে কলাগাছ হয়েছে।

আকাশের চাঁদ হাতে পাওয়া (দুর্লভ বস্তু প্রাপ্তি) – হারানো ছেলেকে ফিরে পেয়ে বাপ-মা যেন
আকাশের চাঁদ হাতে পেলেন।

- আদায় কাঁচকলায় (শত্রুতা) – তার সঙ্গে আমার আদায় কাঁচকলায় সম্পর্ক, সে আমার দুশমন।
- আদা জল খেয়ে লাগা (প্রাণপণ চেষ্টা করা) – কাজটি শেষ করার জন্য সে আদা জল খেয়ে লেগেছে।
- আক্কেল গুডুম (হতবুদ্ধি, স্তম্ভিত) – ইঁচড়ে পাকা ছেলেটার কথা শুনে আমার আক্কেল গুডুম।
- আমড়া কাঠের টেকি (অপদার্থ) – ও হচ্ছে ধনীর দুলাল, আমড়া কাঠের টেকি, ওকে দিয়ে কিছুই হবে না।
- আকাশ ভেঙে পড়া (ভীষণ বিপদে পড়া) – ব্যাংক ফেল করেছে শুনে তার মাথায় আকাশ ভেঙে পড়ল।
- আমতা আমতা করা (ইতস্তত করা, দ্বিধা করা) – আমতা আমতা না করে স্পষ্ট কথায় দোষ স্বীকার কর।
- আটকপালে (হতভাগ্য) – ছেলেটা এতিম, আটকপালে।
- আঠার মাসে বছর (দীর্ঘসূত্রতা) – তোমার তো আঠার মাসে বছর, কোনো কাজই তাড়াতাড়ি করতে পার না।
- আলালের ঘরের দুলাল (অতি আদরে বড় লোকের নষ্ট পুত্র) – বড়লোকের ঘরে দু-একজন আলালের ঘরের দুলাল মিলবেই।
- আকাশে তোলা (অতিরিক্ত প্রশংসা করা) – চাটুকাররা ধনী ব্যক্তিদের কথায় কথায় আকাশে তোলে।
- আবাঢ়ে গল্প (আজগুবি কেছা) – চাঁদে যাওয়ার কথাটা একসময় ছিল আবাঢ়ে গল্প।
- ইদুর কপালে (নিতান্ত মন্দ ভাগ্য) – আমার মতো ইদুর কপালে লোকের দাম এক কানাকড়িও না।
- ইঁচড়ে পাকা (অকালপক্ব) – অতবড় মানুষটার সাথে তর্ক করেছে, কী ইঁচড়ে পাকা ছেলে বাবা।
- ইতর বিশেষ (পার্থক্য) – সৃষ্টিকর্তার নিকট সব মানুষই সমান, ইতর বিশেষ নেই।
- উত্তম মধ্যম (প্রহার, পিটুনি) – গৃহস্থ চোরটাকে উত্তম মধ্যম দিয়ে ছেড়ে দিল।
- উড়নচন্ডী (অমিতব্যয়ী) – এমন উড়নচন্ডী হলে দুদিনে টাকাকড়ি সব শেষ হবে।
- উভয় সংকট – ‘শাখের করাতে’ দেখ।

- উলুবনে মুক্ত ছড়ানো (অস্থানে মূল্যবান দ্রব্য প্রদান) — তাকে সদুপদেশ দান, উলুবনে মুক্ত ছড়ানোর মতোই নিষ্ফল।
- উড়োচিঠি (বেনামি পত্র) — ডাকাতরা জমিদার বাড়িতে উড়োচিঠি দিয়ে ডাকাতি করেছিল।
- উড়ে এসে জুড়ে বসা (অনধিকারীর অধিকার) — লোকটার মাতব্বরি দেখলে গা জ্বলে যায়। ও এখানকার লোক নয়, উড়ে এসে জুড়ে বসেছে।
- একক্ষুরে মাথা মুড়ানো (একই স্বভাবের) — সকলেই একক্ষুরে মাথা মুড়িয়েছে দেখছি, পরীক্ষায় সবাই ফেল করেছে।
- একচোখা (পক্ষপাতিত্ব, পক্ষপাতদুষ্ট) — একচোখা লোকের কাছে সুবিচার পাওয়া যায় না।
- এক মাঘে শীত যায় না (বিপদ একবারই আসে না) — আমাদের ফাঁকি দিলে, মনে রেখো, এক মাঘে শীত যায় না।
- এলোপাতাড়ি (বিশৃঙ্খলা) — এলোপাতাড়ি গুলি ছুড়লে শত্রুদলের ক্ষতি করতে পারবে না।
- এসপার ওসপার (মীমাংসা) — চূপ করে থেকে লাভ কী, এসপার ওসপার একটা করে ফেল।
- একাদশে বৃহস্পতি (সৌভাগ্যের বিষয়) — এখন তার একাদশে বৃহস্পতি, ধুলোমুঠোও সোনামুঠো হচ্ছে।
- এলাহি কাণ্ড (বিরাট আয়োজন) — বড় বাড়িতে বিয়ে, সেতো এক এলাহি কাণ্ড হবে।
- কলুর বলদ (একটানা খাটুনি) — কলুর বলদের মতো সংসারের চাকায় ঘুরে মরছি।
- কথার কথা (গুরুত্বহীন কথা) — কারও মনে আঘাত দেওয়ার জন্য একথা বলিনি, এটা একটা কথার কথা।
- কপাল ফেরা (সৌভাগ্য লাভ) — লটারির টিকেট কিনে সে তার কপাল ফেরাতে চায়।
- কত ধানে কত চাল (হিসাব করে চলা) — নিজেকে তো আর উপার্জন করতে হয় না, কত ধানে কত চাল হয় বুঝবে কেমন করে।
- কড়ায় গন্ডায় (সম্পূর্ণ, পুরোপুরি) — সে কড়ায় গন্ডায় তার পাওনা বুঝে নিল।
- কান খাড়া করা (মনোযোগী হওয়া) — আমি কী বলি তা শোনার জন্য সে কান খাড়া করে রইল।
- কাঁচা পয়সা (নগদ উপার্জন) — কাঁচা পয়সা পাও কি না, তাই খরচ করতে বাধে না।
- কাঁঠালের আমসত্ত্ব (অসম্ভব বস্তু) — ঐ হাড়কিপ্টে করবে দান, কাঁঠালের আমসত্ত্ব আর কি।
- কূপমধুক (ঘরকুনো, সীমাবদ্ধ জ্ঞান সম্পন্ন) — তুমি তো কূপমধুক, ‘ঘরে হৈতে আজিানা বিদেশ’।
- কেতাদুরস্ত (পরিপাটি) — কথাবার্তায়, পোশাকপরিচ্ছদে কেতাদুরস্ত হলেও সে অন্তঃসারশূন্য।

- কাঠের পুতুল (নির্জীব, অসার) – রাজা কাঠের পুতুলের মতো সিংহাসনে বসেছিলেন, প্রধানমন্ত্রীই দেশ শাসন করতেন।
- কথায় চিড়ে ভেজা (ফাঁকা বুলিতে কার্যসাধন) – কাজটি করাতে হলে নগদ কিছু ঢালো, শুধু কথায় চিড়ে ভেজে না।
- কান পাতলা (সহজেই বিশ্বাসপ্রবণ) – কান পাতলা লোকের অধীনে কাজ করা কঠিন।
- কাছা ঢিলা (অসাবধান) – কাছা ঢিলা লোককে কোনো বড় দায়িত্ব দিতে নেই।
- কুলকাঠের আগুন (তীব্র জ্বালা) – তোমার কথার খোঁচায় আমার সারা দেহে কুলকাঠের আগুন জ্বলছে।
- কৈঁচো খুঁড়তে সাপ (সামান্য থেকে অসামান্য পরিস্থিতি) – ব্যাপারটা নিয়ে বেশি নাড়াচাড়া করলে কৈঁচো খুঁড়তে সাপ বেরোবে।
- কেউকেটা (সামান্য) – ও একেবারে কেউকেটা লোক নয়, ওর সঙ্গে লাগতে যেও না।
- কৈঁচে গধুস (পুনরায় আরম্ভ) – সবটাই ভুল হয়েছে, আবার কৈঁচে গধুস করতে হবে দেখছি।
- কৈ মাছের প্রাণ (যা সহজে মরে না) – লোকটা এত অত্যাচারেও মরেনি, কৈ মাছের প্রাণ দেখছি।
- খয়ের খাঁ (চাটুকর) – তুমি তো বড় সাহেবের খয়ের খাঁ, তিনি যা বলেন তুমি তাই বল।
- খন্ড প্রলয় (ভুমুল কাণ্ড, ভীষণ ব্যাপার) – সামান্য ঘটনা থেকে এমন খন্ড প্রলয় হবে ভাবিনি।
- গড্ডলিকা প্রবাহ (অলঙ্ঘন অনুকরণ) – গড্ডলিকা প্রবাহে যারা গা ভাসিয়ে দেয়, আমি তাদের দলে নেই।
- গদাই লস্করি চাল (অতি ধীর গতি, আলসেমি) – এমন গদাই লস্করি চালে চললে ট্রেন ফেল করবে।
- গণেশ উল্টানো (উঠে যাওয়া, ফেল মারা) – কর্মচারীদের চুরির ফলে দোকানটা গণেশ উল্টিয়েছে।
- গলগ্রহ (পরের বোঝাস্বরূপ থাকা) – কারো গলগ্রহ হয়ে থাকা যে কী কষ্ট, তা আমার বিলক্ষণ জানা আছে।
- গোয়ার গোবিন্দ (নির্বোধ অথচ হঠকারী) – সে যেমন জেদি তেমনি রাগী, তার মতো গোয়ার গোবিন্দকে নিয়ে পথ চলা যায় না।
- গোল্লায় যাওয়া (নষ্ট হওয়া, অধঃপাতে যাওয়া) – কুসঙ্গে পড়ে ছেলেটা গোল্লায় গেছে।
- গোবর গণেশ (মূর্খ) – না জানে লেখাপড়া, না আছে বুদ্ধি – ছেলেটা একেবারে গোবর গণেশ।
- গাছে তুলে মই কাড়া (আশা দিয়ে আশ্বাস ভজা করা) – আমাকে এগিয়ে দিয়ে সরে পড়েছ, একেই বলে গাছে তুলে মই কাড়া।
- গায়ে ফুঁ দিয়ে বেড়ানো (কোনো দায়িত্ব গ্রহণ না করা) – গায়ে ফুঁ দিয়ে বেড়ালে সংসার চলবে কেমন করে?
- গৌফ খেজুরে (নিতান্ত অলস) – গৌফ খেজুরে লোক দিয়ে কোনো কাজই হয় না।

- গোড়ায় গলদ (শুরুতে ভুল) – অঙ্ক মিলবে কেমন করে? গোড়াতেই তো গলদ।
- গুড়ে বালি (আশায় নৈরাশ্য) – আশা করেছিলাম আমার সম্পত্তি পাব, এখন দেখছি সে গুড়ে বালি।
- ঘর ভাঙানো (সংসার বিনষ্ট করা) – তোমার মতো ঘর ভাঙানো বৌ আর দেখিনি।
- ঘাটের মড়া (অতি বৃন্দা) – টাকার লোভে ঘাটের মড়ার সঙ্গে মেয়ের বিয়ে দিও না।
- ঘোড়ারোগ (সাধের অতিরিক্ত সাধ) – মাসে তিন হাজার টাকা মাইনে পেয়ে গাড়ি কিনতে চাও, একেই বলে গরিবের ঘোড়ারোগ।
- ঘোড়া ডিঙিয়ে ঘাস খাওয়া (মধ্যবর্তীকে অতিক্রম করে কাজ করা) – অফিসের বড় সাহেবকে না জানিয়ে ছোট সাহেবকে বলা, ঘোড়া ডিঙিয়ে ঘাস খাওয়ার মতো।
- চাঁদের হাট (আনন্দের প্রাচুর্য) – ধনেজনে চৌধুরী সাহেবের সংসার যেন চাঁদের হাট।
- চিনির বলদ (ভারবাহী তবে ফল লাভের অংশীদার নয়) – সংসারে চিনির বলদের মতো খেটে মরছি, কিছুই পাই না।
- চোখের বালি (চক্ষুশূল) – বখাটে ছেলেটা সকলের চোখের বালি।
- চোখের পর্দা (লজ্জা) – তোমার দেখছি চোখের পর্দা নেই; কেমন করে এ কাজ করলে?
- ছকড়া নকড়া (সস্তা দর) – নিলামের মাল, তাই ছকড়া নকড়ায় বিক্রি হয়ে গেল।
- ছাপোষা (অত্যন্ত গরিব) – আমার মতো ছাপোষা লোকের কোনো শখ থাকতে নেই।
- ছিনিমিনি খেলা (নষ্ট করা) – পরের টাকায় ছিনিমিনি খেলতে লজ্জা করল না?
- ছেলের হাতের মোয়া (সহজলভ্য বস্তু) – রত্নহার ছেলের হাতের মোয়া নয় যে চাইলেই পাবে।
- জগাখিচুড়ি পাকানো (গোলমাল বাধানো) – ব্যাপারটা জগাখিচুড়ি পাকিয়ে সে সরে পড়ল।
- জিলাপির প্যাচ (কুটিলতা) – ভালোমানুষ মনে হলেও তার ভেতরে রয়েছে জিলাপির প্যাচ।
- ঝোপ বুঝে কোপ মারা (সুযোগ মতো কাজ করা) – ঝোপ বুঝে কোপ মারতে পেরেছে বলেই সে কৃতকার্য হয়েছে।
- টনক নড়া (চৈতন্যদয় হওয়া/বুঝে ওঠা) – ব্যবসায় ক্ষতি হতেই তার টনক নড়ল।
- ঠাট বজায় রাখা (অভাব চাপা রাখা) – অভাবে পড়লেও তিনি ঠাট বজায় রেখে চলেছেন।
- ঠোটকাটা (বেহায়া) – তোমার মতো ঠোট কাটা ছেলে আর দেখিনি, মুখের ওপর এ কথা বললে।
- ডুমুরের ফুল – ‘অমাবস্যার চাঁদ’ দেখ।

- ঢাক ঢাক গুড় গুড় (গোপন রাখার চেষ্টা) — ঢাক ঢাক গুড় গুড় করে লাভ কী, ব্যাপারটা খুলে বল।
- ঢাকের কাঠি (মোসাহেব) — ‘খয়ের খা’ দেখ।
- তালকানা (বেতাল হওয়া) — চোখে চশমা, আর চশমা খুঁজে বেড়াচ্ছে, আচ্ছা তালকানা লোক।
- তাসের ঘর (ক্ষণস্থায়ী বস্তু) — ঠুনকো বস্তুত্ব স্বার্থের সামান্য আঘাতেই তাসের ঘরের মতো ভেঙে যায়।
- তামার বিষ (অর্থের কু প্রভাব) — হঠাৎ বড় লোক কি না, তাই তামার বিষে বিবেকহীন হয়ে পড়েছে।
- থ বনে যাওয়া (সতস্কিত হওয়া) — তোমার কান্ড দেখে আমি তো থ বনে গেলাম।
- দা-কুমড়া — ‘অহিনকুল’ দ্রষ্টব্য।
- দহরম মহরম (ঘনিষ্ঠ সম্পর্ক) — সাহেবের সাথে তোমার যখন এত দহরম মহরম, তখন কাজটা করিয়ে দাও ভাই।
- দুমুখো সাপ (দুজনকে দুরকম কথা বলে পরস্পরের মধ্যে শত্রুতা সৃষ্টিকারী) — লোকটা একটা দুমুখো সাপ; আমাদের দুজনকে দুরকম কথা বলে দুজনের মধ্যে শত্রুতা সৃষ্টি করেছে।
- দুধের মাছি (সুসময়ের বস্তু) — সুদিনে যে দুধের মাছি, দুর্দিনে তার সাক্ষাৎ মেলে না।
- ধরাকে সরা জ্ঞান করা (সকলকে তুচ্ছ ভাবা) — বড়লোক হয়েছে বলে ধরাকে সরা জ্ঞান করো না।
- ধরি মাছ না ছুঁই পানি (কৌশলে কার্যোন্মুখ) — এ ব্যাপারে আমার ভূমিকা হবে ধরি মাছ না ছুঁই পানি।
- ননীর পুতুল (শ্রমবিমুখ) — ছেলেটি একেবারে ননীর পুতুল, একটু পরিশ্রমেই হাঁপিয়ে ওঠে।
- নয়ছয় (অপচয়) — সে বাড়ি বিক্রির টাকাগুলো নয়ছয় করে ফেলল।
- নেই আঁকড়া (একগুঁয়ে) — এমন নেই আঁকড়া ছেলে আর তো দেখিনি বাবা যা বলবে তাই!
- পটল তোলা (অন্ধা পাওয়া) — শয়তানটা পটল তুলেছে, এবার গায়ের লোকের হাড় জুড়াবে।
- পালের গোদা (দলপতি) — পুলিশ পালের গোদাকে ধরতে পারেনি, সাধারণ মানুষের হাতে হাতকড়া পরিয়েছে।
- পুকুরচুরি (বড় রকমের চুরি) — কিছু কর্মচারী পুকুরচুরি করে প্রতিষ্ঠানে লাগবাতি জ্বালিয়েছে।
- ফপার দালালি (অতিরিক্ত চালবাজি) — সবখানে ফপার দালালি চলে না, জায়গা বুঝে কাজ করতে হয়।
- ফোড়ন দেওয়া (টিস্পনি কাটা) — কথায় কথায় ফোড়ন দিলে কাজ করা দায় হয়ে উঠবে।
- বক ধার্মিক/বিড়াল তপস্বী (ভণ্ড সাধু) — মুখে ধর্মের কথা বললেও লোকটা আসলে বক ধার্মিক।
- বর্ণচোরা (কপট ব্যক্তি) — লোকটা বর্ণচোরা, তার আসল রূপ ধরা যায় না।
- বালির বাঁধ (অস্থায়ী বস্তু) — ‘বড়র পিরিতি যেন বালির বাঁধ।’
- বাঁ হাতের ব্যাপার (ঘুম গ্রহণ) — এ অফিসের কিছু কর্মচারী বাঁ হাতের ব্যাপারে সিদ্ধহস্ত।

বাঘের দুধ/চোখ (দুঃসাধ্য বস্তু)	— টাকায় বাঘের দুধ মেলে।
বিসমিল্লায় গলদ	— ‘গোড়ায় গলদ’ দ্রষ্টব্য।
বুন্দির টেকি (নিরেট মূর্খ)	— ‘ইঁকাটি বাড়ায়ে রয়েছে দাঁড়ায়ে বেটা বুন্দির টেকি।’
ব্যাঙের আধুলি (সামান্য সম্পদ)	— এই সামান্য কটা টাকা ব্যাঙের আধুলি আর কি।
ব্যাঙের সর্দি (অসম্ভব ঘটনা)	— জেল খাটা আসামিকে দেখাচ্ছ জেলের ভয়— ব্যাঙের আবার সর্দি!
ভরাডুবি (সর্বনাশ)	— আমি কারো ভরাডুবি করিনি যে সবাই আমার বিরুদ্ধে লেগেছে।
ভূতের বেগার (অযথা শ্রম)	— জীবনভর ভূতের বেগার খেটে গেলাম, লাভ কিছুই হলো না।
ভিজ্জে বিড়াল (কপটাচারী)	— সমাজে ভিজ্জে বেড়ালদের চেনা সহজ নয়।
ভুষন্ডির কাক (দীর্ঘজীবী)	— স্ত্রী, পুত্র, কন্যা— সবার মৃত্যুর পরও বৃন্দ ভুষন্ডির কাকের মতো বেঁচে আছে।
মগের মুল্লুক (অরাজক দেশ)	— এটা কি মগের মুল্লুক পেয়েছ যে যা খুশি তাই করবে?
মণিকাঞ্চন যোগ (উপযুক্ত মিলন)	— যেমন বর, তেমনি কনে, একেবারে মণিকাঞ্চন যোগ।
মন না মতি (অস্থির মানব মন)	— মানুষের মন তো বদলেই থাকে; কথায় বলে— ‘মন না মতি’।
মাছের মায়ের পুত্রশোক (কপট বেদনাবোধ)	— নিজের পুত্রের মৃত্যুতে একফোঁটা চোখের পানি পড়ল না— অথচ অন্যের জন্য কাঁদছে, এ যে মাছের মায়ের পুত্রশোক।
মিছরির ছুরি (মুখে মধু অন্তরে বিষ)	— শুনতে মধুর হলেও তার কথাগুলো মিছরির ছুরির মতো অন্তরকে বিদ্ধ করে।
যক্ষের ধন (কৃপণের কড়ি)	— যক্ষের ধনের মতো সে তার টাকাকড়ি আগলে আছে, এক পয়সাও দান করে না।
রাঘব বোয়াল (সর্বগ্রাসী ক্ষমতাসীন ব্যক্তি)	— সমাজপতির রাঘব বোয়াল হয়ে গরিবের সর্বনাশ করে।
রাবণের চিতা (চির অশান্তি)	— ‘রাবণের চিতাসম জ্বলিছে হৃদয় মম।’
রাশভারি (গম্ভীর প্রকৃতির)	— আমাদের বড় সাহেব খুব রাশভারি লোক, তাঁর সাথে বুঝেবুঝে কথা বলো।
ঝুই-কাতলা (পদস্থ বা নেতৃস্থানীয় ব্যক্তি)	— দেশের সুযোগ সুবিধা ঝুই-কাতলারাই বেশি ভোগ করে।
লেফাফা দুরস্ত (বাইরের ঠাট বজায় রেখে চলেন যিনি)	— এই লেফাফা দুরস্ত লোকটিকে দেখে কি মনে হয় যে, ইনি কপর্দকশূন্য?
শাঁখের করাত (উভয় সংকট)	— সত্যকথা বললে বাবার ক্ষতি, আবার মিথ্যাকথা বললে মায়ের ক্ষতি, আমার হয়েছে শাঁখের করাতের অবস্থা।

- শাপে বর (অনিষ্টে ইষ্ট লাভ) — আমাকে ফেলে যাওয়ায় আমার রোজগার হলো হাজার টাকা—একেই বলে শাপে বর।
- সোনায়ে সোহাগা — ‘মণি কাঞ্চন যোগ’ দ্রষ্টব্য।
- সাক্ষী গোপাল (নিষ্ক্রিয় দর্শক) — তোমাদের এই পারিবারিক কলহে আমার সাক্ষী গোপাল হওয়া ছাড়া উপায় নেই।
- হাটে হাঁড়ি ভাঙা (গোপন কথা প্রকাশ করা) — আমাকে ঝাঁটিও না বলছি, তা হলে আমি হাটে হাঁড়ি ভেঙে দেব।
- হাতটান (চুরির অভ্যাস) — দামি জিনিসপত্র সাবধানে রেখ, ছেলেটার হাতটান অভ্যাস আছে।
- হাড় হাভাতে (হতভাগ্য) — সব হারিয়ে ছেলোটিকে একেবারে হাড় হাভাতে এর কিছু হবে না।
- হালে পানি পাওয়া (সুবিধা করা) — ব্যবসায় অনেক চেষ্টাই তো করলাম, কিন্তু হালে পানি পেলাম না।

সমার্থক শব্দ

যেসব শব্দ একই অর্থ প্রকাশ করে, তাদের সমার্থক বা একার্থক শব্দ বলে। রচনার মাধুর্য সৃষ্টির জন্য অনেক সময় একটা অর্থকেই বিভিন্ন বাক্যে বিভিন্ন শব্দ দ্বারা প্রকাশ করা প্রয়োজন হয়। কবিতায় এর প্রয়োগ বেশি। এখানে কতগুলো সমার্থক শব্দের উদাহরণ দেওয়া হলো :

অন্ধকার	— আঁধার, তমসা, তিমির।	পৃথিবী	— অবনী, ধরা, ধরণী, ধরিত্রী, বসুন্ধরা, ভূ, মেদিনী।
আকাশ	— অম্বর, গগন, নভঃ, ব্যোম।	পর্বত	— অচল, অদ্রি, গিরি, পাহাড়, ভূধর, শৈল।
আগুন	— অগ্নি, অনল, পাবক, বহি, হুতাশন।	পিতা	— আব্বা, জনক, বাবা।
ঈশ্বর	— আল্লাহ, খোদা, জগদীশ্বর, ধাতা, বিধাতা, ভগবান, সৃষ্টিকর্তা, স্রষ্টা।	পুত্র	— ছেলে, তনয়, নন্দন, সূত।
কান	— কর্ণ, শ্রবণ।	মাতা	— গর্ভধারিণী, প্রসূতি, মা, জননী।
চুল	— অলক, কুণ্ডল, কেশ, চিকুর।	কোকিল	— পরভূত, পিক।
চোখ	— অক্ষি, চক্ষু, নয়ন, নেত্র, লোচন।	গরু	— গো, গাভী, ধেনু।
জল	— অম্বু, জীবন, নীর, পানি, সলিল।	চাঁদ	— চন্দ্র, নিশাকর, বিধু, শশধর, শশাঙ্ক, সুধাংশু, হিমাংশু।
তীর	— কূল, তট, সৈকত।	রাজা	— নৃপতি, নরপতি, ভূপতি।
দিন	— দিবস, দিবা।	সূর্য	— আদিত্য, তপন, দিবাকর, ভাস্কর, ভানু, মার্তন্ড, রবি, সবিতা।
দেবতা	— অমর, দেব, সুর।	স্বর্গ	— দেবলোক, দ্যুলোক, বেহেশত।
দেহ	— গাত্র, গা, তনু, শরীর।		
ধন	— অর্থ, বিত্ত, বিভব, সম্পদ।		

নদী	- তটিনী, স্রোতস্বতী, স্রোতস্বিনী।	সাপ	- অহি, আশীবিষ, নাগ, ফণী, ভুজঙ্গ, সর্প।
নারী	- অবলা, কামিনী, মহিলা, স্ত্রীলোক, রমণী।	সমুদ্র	- অর্ণব, জলধি, জলনিধি, পারাবার, বারিধি, রত্নাকর, সাগর, সিন্ধু।
মৃত্যু	- ইন্তেকাল, ইহলীলা-সংবরণ, ইহলোক ত্যাগ, চিরবিদায়, জ্ঞানাতবাসী হওয়া। দেহত্যাগ, পঞ্চতুপ্রাপ্তি, পরলোকগমন, লোকান্তরগমন, শেষ নিঃশ্বাস ত্যাগ, স্বর্গলাভ।	হাতি	- কর, বাহু, ভুজ, হস্ত।

বাক্যে প্রয়োগ

- ✽ ‘কী যাতনা বিধে, বুঝিবে সে কিসে, কভু আশীবিষে দংশেনি যারে।’
- ✽ ‘গগনে উদিল রবি লোহিত বরণ।’
- ✽ দিবসে আলস্যে নিদ্রা অতি দূষণীয়।
- ✽ অবলা সবলা আজ নহে তো দুর্বলা।
- ✽ প্রচণ্ড মার্তন্ড তাপে গলিছে তুষারপিণ্ড।

বিভিন্নার্থক শব্দ

একই শব্দের নানা প্রকার অর্থ থাকলে তাকে বিভিন্নার্থক শব্দ বলে। উদাহরণ—

- ১। অঙ্ক— (১) সংখ্যা — টাকার অঙ্ক কত হবে?
(২) ঐক — অঙ্কটা কষ।
(৩) চিহ্ন — পদাঙ্ক (পদচিহ্ন) অনসুরণ কর।
(৪) কোল — শিশুকন্যাটিকে অঙ্কে নিয়ে জননী আদর করছেন।
(৫) নাটকের প্রধান পরিচ্ছেদ — এই নাটকের ষষ্ঠ অঙ্কের প্রথম দৃশ্যটি খুব কল্পণ।
- ২। অচল— (১) গতিহীন — শরীর অচল হয়ে পড়েছে।
(২) একনিষ্ঠ — ঈশ্বরে অচল ভক্তি হোক।
(৩) মেকি, অব্যবহার্য — এ অচল টাকা কে নেবে?
(৪) অপ্রচলিত — হাজার টাকার এই নোটটি অচল।
(৫) নির্বাহ করা কঠিন — অর্থের অভাবে সংসার অচল হয়ে গেছে।
(৬) পর্বত — ‘উচল বলিয়া অচলে বাড়িনু পড়িনু অগাধ জলে।’

- ৩। অন্তর— (১) মন — ‘অন্তর মম বিকশিত কর।’
 (২) অন্য — তিনি দেশান্তরে গিয়েছেন।
 (৩) ব্যবধান, পার্থক্য — এখান থেকে একঘণ্টা অন্তর বাস ছাড়ে।
 (৪) আত্মীয় — ‘অন্তর মম বিকশিত কর, অন্তরতর হে।’
- ৪। কূট— (১) কুটিল — তার কূট বুদ্ধির সঙ্গে পারবে কেন?
 (২) জটিল — এটা কূট প্রশ্ন, উত্তর দেওয়া কঠিন।
 (৩) কপট, জাল — কূট সাক্ষী সাক্ষ্য দিতে সে এসে ধরা পড়েছে।
 (৪) পর্বতশৃঙ্গ — পর্বতকূটে আরোহণ করা দুরূহ।
- ৫। গুণ— (১) ধর্ম — দ্রব্যের গুণ জানতে হয়।
 (২) ক্রিয়া — ওষুধে গুণ করেছে।
 (৩) উৎকর্ষ — তুমি তো নিজের গুণকীর্তন করছ।
 (৪) উপকরণ — শিক্ষার গুণ অনেক।
 (৫) দড়ি — মাঝিরা নৌকার গুণ টেনে এসেছে।
- ৬। ধর্ম— (১) সৎকাজ, পুণ্যকাজ — অহিংসা পরম ধর্ম।
 (২) সুনীতি — এটা ধর্মসংগত কাজ।
 (৩) সম্প্রদায় বিশেষের উপাসনাপদ্ধতি ইত্যাদি — প্রত্যেক ধর্মই মানুষের চরিত্রকে উন্নত করে।
 (৪) স্বভাব — মানুষ ও পশুর ধর্ম পৃথক।
- ৭। পক্ষ (১) দল — তুমি কোন পক্ষে?
 (২) মাসার্ধ — দুই পক্ষ নিয়ে এক মাস।
 (৩) চাঁদের ক্ষয় বা বৃদ্ধি কাল — এখন শুরুপক্ষ।
 (৪) পাখির ডানা — যাদের পক্ষ আছে তাদের পাখি বলে।
 (৫) বিয়ে সংখ্যা — ছেলেটি তাঁর প্রথম পক্ষের সন্তান।

বিপরীতার্থক শব্দ

একটি শব্দের বিপরীত অর্থবাচক শব্দকে বিপরীতার্থক শব্দ বলে।

শব্দের পূর্বে সাধারণত অ, অন, অনা, অপ, অব, দূর, ন, না, নি, নির প্রায়ই না-বাচক বা নিষেধবোধক অর্থ প্রকাশ করে। তাই শব্দের বিরোধার্থক শব্দ তৈরিতে এই উপসর্গগুলো কিছুটা সাহায্য করে। তবে গঠনগত দিক থেকে শব্দের বিপরীতার্থক শব্দগুলো প্রায়ই মূল শব্দের সঙ্গে সম্পর্কশূন্য। উদাহরণ :

শব্দ	বিপরীতার্থক
কাজ	অকাজ
উপচয়	অপচয়
কৃতজ্ঞ	অকৃতজ্ঞ, কৃতঘ্ন
কেজো	অকেজো
চেতন	অচেতন
চেনা	অচেনা
জানা	অজানা
জ্ঞানী	অজ্ঞান
ধর্ম	অধর্ম
নশ্বর	অবিনশ্বর
লক্ষ্মী	অলক্ষ্মী
শান্ত	অশান্ত
শিষ্ট	অশিষ্ট
শুভ	অশুভ
শ্রদ্ধা	অশ্রদ্ধা
অন্ত	অনন্ত
স্বাবর	অস্বাবর, জজ্ঞাম
অতিবৃষ্টি	অনাবৃষ্টি
অভিজ্ঞ	অনভিজ্ঞ
আচার	অনাচার
আত্মীয়	অনাত্মীয়
আদর	অনাদর
আবশ্যক	অনাবশ্যক
আবিল	অনাবিল
আস্থা	অনাস্থা
ইচ্ছা	অনিচ্ছা
ইষ্ট	অনিষ্ট
উপস্থিত	অনুপস্থিত

শব্দ	বিপরীতার্থক
সঞ্চয়	ব্যয়
উন্নত	অবনত, অনুন্নত
উৎকর্ষ	অপকর্ষ
যশ	অপযশ
সবল	দুর্বল
সুকৃত	দুষকৃত
সুখ	দুঃখ
সুলভ	দুর্লভ
সুশীল	দুঃশীল
আসল	নকল
আস্তিক	নাস্তিক
লায়েক	নালায়েক
খুঁত	নিখুঁত
খোঁজ	নিখোঁজ
বিরত	নিরত
অন্তরঙ্গ	বহিরঙ্গ
আশা	নিরাশা
অধর্মণ	উত্তমর্ণ
অর্থ	অনর্থ
ধনী	নির্ধন, দরিদ্র
প্রবল	দুর্বল
রোগ	নীরোগ
সচেষ্ঠ	নিচেষ্ঠ
সদয়	নির্দয়
সম্মল	নিঃসম্মল
সরস	নীরস
সাকার	নিরাকার

শব্দ	বিপরীতার্থক শব্দ
আকর্ষণ	বিকর্ষণ
পথ	বিপথ
বাদী	বিবাদী
যুক্ত	বিযুক্ত
সফল	বিফল
সুশ্রী	বিশ্রী
স্মৃতি	বিস্মৃতি
ঠিক	বেঠিক
তাল	বেতাল
হাল	বেহাল
হুঁশ	বেহুঁশ
অগ্র	পশ্চাৎ
অচল	সচল
অনুকূল	প্রতিকূল
অন্তর	বাহির
অধম	উত্তম
উৎসাহ	নিরুৎসাহ
অল্প	অধিক
দোষী	নির্দোষ
আকুঞ্জন	প্রসারণ
আগে	পিছে
আপদ	নিরাপদ
আপন	পর
আদান	প্রদান
আদি	অন্ত
আবির্ভাব	তিরোভাব
আমদানি	রপ্তানি
আয়	ব্যয়

শব্দ	বিপরীতার্থক
অজ্ঞ	বিজ্ঞ
অনুরক্ত	বিরক্ত
অনুরাগ	বিরাগ
ডোবা	ভাসা
তিরস্কার	পুরস্কার
উচ্চ	নিচ
উত্থান	পতন
উদয়	অস্ত
উন্নতি	অবনতি
উর্ধ্ব	অধ
এলোমেলো	গোছানো
ওঠা	নামা
ওস্তাদ	সাগরেদ
কৃত্রিম	স্বাভাবিক
কোমল	কর্কশ
ক্রয়	বিক্রয়
ক্ষুদ্র	বৃহৎ
খাঁটি	ভেজাল
খাতক	মহাজন
খুচরা	পাইকারি
খোলা	বন্ধ
গরিষ্ঠ	লঘিষ্ঠ
গুরু	লঘু
গ্রহী	সন্নিয়সী
গ্রহণ	বর্জন
ঘাটতি	বাড়তি
ঘাত	প্রতিঘাত
চোর	সাধু
চোখা	ভোঁতা
ছাত্র	অছাত্র
জন্ম	মৃত্যু
জয়	পরাজয়
জড়	চেতন
ভোঁতা	ধারালো

শব্দ	বিপরীতার্থক
আসল	নকল
ইতর	ভদ্র
ইদানীং	তদানীং
লঘু	গুরু
লাভ	ক্ষতি, লোকসান
তেজী	নিস্তেজ
দাতা	গ্রহীতা
দিন	রাত
দীর্ঘ	হ্রস্ব
দুষ্ট	শিষ্ট
দূর	নিকট
দেওয়া	নেওয়া
দেনা	পাওনা
ধনী	নির্ধন, গরিব
নতুন	পুরাতন
নরম	শক্ত
নিদ্রিত	জাগ্রত
নিন্দা	প্রশংসা
বন্ধন	মুক্তি
বন্ধু	শত্রু
বর	বৌ
বর্ধমান	ক্ষীয়মান
বড়	ছোট
বাচাল	স্বল্পভাষী
জীবন	মরণ
বেহেশত	দোজখ
বোকা	চালাক
ব্যর্থ	সার্থক
ভয়	সাহস
ভিতর	বাহির
ভীতু	সাহসী
ভীৰু	নির্ভীক
ভূত	ভবিষ্যৎ
উত্তর	দক্ষিণ

শব্দ	বিপরীতার্থক শব্দ
উপকার	অপকার
মান	অপমান
ইহলোক	পরলোক
ইহা	উহা
মিলন	বিরহ
শত্রু	মিত্র
শীঘ্র	বিলম্ব
সত্য	মিথ্যা
সমষ্টি	ব্যষ্টি
সার্থক	ব্যর্থ
সুন্দর	কুৎসিত
সৃষ্টি	ধ্বংস
স্থির	চঞ্চল
স্মৃতি	বিস্মৃতি
স্বকীয়	পরকীয়
স্বতন্ত্র	পরতন্ত্র
স্বর্গ	নরক
স্বাধীন	পরাধীন
হরণ	পূরণ
হার	জিত
হান্ধা	ভারি
হাসি	কান্না
হ্রাস	বৃদ্ধি
জোয়ার	ভাটা
মুখ্য	গৌণ
টাটকা	বাসি
মৃদু	প্রবল
ঠকা	জেতা
রাজা	প্রজা
ঠান্ডা	গরম
বুগ্গণ	সুস্থ
জাগরিত	নিদ্রিত
পূর্ব	পশ্চিম

বাক্যে বিপরীতার্থক শব্দের প্রয়োগ

- ◆ যুদ্ধে জয়-পরাজয় নির্ধারিত হবে।
- ◆ ব্যবসায় লাভ-ক্ষতি আছেই।
- ◆ জীবনে হাসি-কান্না পর্যায়ক্রমে আসে।
- ◆ সাগরে জোয়ার-ভাটা পানির হ্রাস-বৃদ্ধি ঘটে।
- ◆ হালকা আর ভারি যন্ত্রগুলো ধোয়ামোছা কর।
- ◆ ‘কোথায় স্বর্গ, কোথায় নরক, কে বলে তা বহুদূর?’
- ◆ এ জগৎ হরণ-পূরণের মেলা।
- ◆ খেলায় হার-জিত থাকবেই।
- ◆ পরাধীন হয়ে সুখভোগের চেয়ে স্বাধীন হয়ে দুঃখ ভোগ করাও ভালো।
- ◆ ছেলেটি বড়ই চঞ্চল, কিন্তু মেয়েটি কেমন ধীরস্থির।
- ◆ সবলের সদম্ভ অত্যাচার দুর্বল আর কতদিন সহ্য হবে?
- ◆ সাহস দিয়ে ভয়কে জয় কর।

অনুশীলনী

১। প্রত্যেকটি প্রশ্নের চারটি করে উত্তর দেওয়া হলো। ঠিক উত্তরটিতে টিক (✓) চিহ্ন দাও।

(১) ‘কার্যে বিরতি’ অর্থে কোন বাগ্‌ধারাটি প্রযোজ্য?

- | | |
|-------------|--------------|
| ক. হাত করা | গ. হাত গুটান |
| খ. হাত থাকা | ঘ. হাত আসা |

(২) ‘পছন্দ হওয়া’ অর্থে রীতিসিদ্ধ প্রয়োগ কোনটি?

- | | |
|------------|--------------|
| ক. গৌ ধরা | গ. ম্যাগ ধরা |
| খ. মনে ধরা | ঘ. পথ ধরা |

(৩) কোন বাগ্‌ধারাটির অর্থ ‘বেহায়া’?

- | | |
|------------------|-------------|
| ক. চিনির বলদ | গ. কান কাটা |
| খ. জিলাপির প্যাচ | ঘ. ঠোট কাটা |

(৪) ‘সর্বনাশ’ বোঝাতে কোন বাগ্‌ধারাটি প্রয়োজন?

- | | |
|---------------|-----------------|
| ক. ভরাডুবি | গ. পুকুর চুরি |
| খ. বালির বাঁধ | ঘ. মগের মুল্লুক |

(৫) কোন বাগ্‌ধারাটির অর্থ ‘সম্মান বাঁচানো’?

- | | |
|--------------|------------|
| ক. মুখ ছোঁটা | গ. মুখরা |
| খ. মুখ করা | ঘ. মুখ ধরা |

(৬) কোন বাগ্ধারাটির অর্থ ‘বিরাত আয়োজন?’

ক. কপাল ফেরা

গ. আধকপালে

খ. কড়ায় গন্ডায়

ঘ. এলাহিকাণ্ড

(৭) ‘এসপার ওসপার’ বাগ্ধারাটির অর্থ কী?

ক. এদিক অথবা ওদিক

গ. এই পাড়ে অথবা ওই পাড়ে

খ. মীমাংসা

ঘ. এ রকম অথবা ওই রকম

(৮) ‘গোবর গণেশ’ বাগ্ধারাটির অর্থ কী?

ক. গোবরের মতো আবর্জনা

গ. চালাক

খ. বোকা

ঘ. মূর্খ

(৮) ‘গোড়ায় গলদ’ বাগ্ধারাটির অর্থ কী?

ক. বেশি ভুল

গ. শুরুতে ভুল

খ. ভুল জিনিস

ঘ. অল্প ভুল

(১০) ‘গোল্লায় যাওয়া’ বাগ্ধারাটির অর্থ কী?

ক. নষ্ট হওয়া

গ. অসৎ কাজ করা

খ. খারাপ কাজে যাওয়া

ঘ. দোষের কাজ করা

২। বাংলা শব্দের ব্যবহারে বাচ্যার্থ ও লক্ষ্যার্থ বলতে কী বোঝায়?

৩। শব্দের আভিধানিক অর্থের সঙ্গে তার ব্যবহারিক অর্থের যে ধরনের পার্থক্য দেখা যায়, তা উদাহরণ সহযোগে ব্যাখ্যা কর।

৪। বাগ্ধারা বা বাক্যরীতি বলতে কী বোঝ? ‘মুখ’ অথবা ‘হাত’ শব্দের রীতিসিদ্ধ প্রয়োগ দেখিয়ে পাঁচটি বাক্য রচনা কর।

৫। বিশেষ্যস্থানীয় ও বিশেষণস্থানীয় বাক্যাংশের প্রয়োগ দেখিয়ে চারটি করে বাক্য গঠন কর।

৬। নিম্নলিখিত রীতিসিদ্ধ বাক্যাংশগুলোর অর্থ পাশাপাশি লিখে দাও :

পাকা হাতের লেখা—

।

গায়ে বাতাস লাগা—

মাথা কাটা যাওয়া—

।

গা ঢেলে দেওয়া—

হাত গুটিয়ে বসা—

।

হাত দেওয়া—

হাতে পায়ে ধরা—

।

বুকে লাগা—

(৭) অর্থের পার্থক্য দেখাও

{ গা লাগা
{ গায়ে লাগা

{ নাম কাটা
{ নামে কাটা

{ ডাক দেওয়া
{ ডাকে দেওয়া

{ হাত আসা
{ হাতে আসা

{ মন করা
{ মনে করা

{ মাথা দেওয়া
{ মাথায় দেওয়া।

৮। ডানপাশে শব্দ দেওয়া আছে। তার ওপর ভিত্তি করে বাগ্‌ধারা যোগে বাঁ পাশের শূন্যস্থান পূরণ কর।

- (ক) লোকটার চোখের নেই। (লজ্জা)
 (খ) ভাইয়ের সঙ্গে সম্বন্ধ। (ভীষণ গরমিল)
 (গ) এত শোকতাপের পরেও যে বেঁচে আছি তার কারণ আমার তো। (যা সহজে মরে না)
 (ঘ) লোককে বড় কাজের দায়িত্ব দিতে নেই। (অসাবধান)
 (ঙ) পরের টাকা হাতে পেলেই অনেক করে। (নষ্ট করা)
 (চ) এমন লোক কমই দেখা যায়। (নির্লজ্জ)
 (ছ) তোমার কাঙ্ক্ষাকারখানা দেখে আমি তো বনে গেছি। (স্তম্ভিত হওয়া)
 (জ) বাইরে ধর্মের কথা বলে বেড়ালেও লোকটা আসলে। (ভণ্ড)
 (ঝ) ‘আমি ভরা তরী করি.....’ (সর্বনাশ)
 (ঞ) সমাজপতিরাই হয়ে গরিবের সর্বনাশ করে। (ক্ষমতালী ব্যক্তি)
 (ট) কে যেন আমার কলমটার করেছে। (অপহরণ)

৯। উভয় সারির সামঞ্জস্য বিধান কর।

- | | |
|-----------------|--------------------|
| (১) হাড় হাতাতে | (১) অযথা শ্রম |
| (২) ভূতের বেগার | (২) একগুঁয়ে |
| (৩) বালির বাঁধ | (৩) ক্ষণস্থায়ী |
| (৪) নেই আঁকড়া | (৪) অস্থায়ী বস্তু |
| (৫) তাসের ঘর | (৫) আশায় নৈরাশ্য |
| (৬) গুড়ে বালি | (৬) হতভাগ্য |

১০। নিম্নলিখিত বাগ্‌ধারাসমূহ দ্বারা সার্থক বাক্য রচনা কর।

- | | |
|--------------------|-----------------------|
| (১) অমাবস্যার চাঁদ | (১) কেঁচো খুঁড়তে সাপ |
| (২) আকাশ কুসুম | (১০) গড্ডলিকা প্রবাহ |
| (৩) আষাঢ়ে গল্প | (১১) তাসের ঘর |
| (৪) গোড়ায় গলদ | (১২) নয় ছয় |
| (৫) চাঁদের হাট | (১৩) বালির বাঁধ |
| (৬) চিনির বলদ | (১৪) রাশভারি |
| (৭) ডুমুরের ফুল | (১৫) রুই কাতলা |
| (৮) কলুর বলদ | (১৬) হাতটান |

তৃতীয় পরিচ্ছেদ বাচ্য এবং বাচ্য পরিবর্তন

১. রবীন্দ্রনাথ ‘গীতাঞ্জলি’ লিখেছেন।

২. রবীন্দ্রনাথ কর্তৃক ‘গীতাঞ্জলি’ লিখিত হয়েছে।

৩. আমার খাওয়া হলো না।

ওপরের প্রথম বাক্যে কর্তার, দ্বিতীয় বাক্যে কর্মের, তৃতীয় বাক্যে ক্রিয়ার প্রাধান্য রয়েছে।

বাক্যের বিভিন্ন ধরনের প্রকাশভঙ্গিকে বলা হয় ‘বাচ্য’।

বাচ্য প্রধানত তিন প্রকার : (১) কর্তৃবাচ্য (২) কর্মবাচ্য ও (৩) ভাববাচ্য।

কর্তৃবাচ্য : যে বাক্যে কর্তার অর্থ-প্রাধান্য রক্ষিত হয় এবং ক্রিয়াপদ কর্তার অনুসারী হয়, তাকে কর্তৃবাচ্যের বাক্য বলে। যেমন— ছাত্ররা অঙ্ক করছে।

১. কর্তৃবাচ্যে ক্রিয়াপদ সর্বদাই কর্তার অনুসারী হয়।

২. কর্তৃবাচ্যে কর্তায় প্রথমা বা শূন্য বিভক্তি এবং কর্মে দ্বিতীয়া, ষষ্ঠী বা শূন্য বিভক্তি হয়। যথা— শিক্ষক ছাত্রদের পড়ান। রোগী পথ্য সেবন করে।

কর্মবাচ্য : যে বাক্যে কর্মের সাথে ক্রিয়ার সম্বন্ধ প্রধানভাবে প্রকাশিত হয়, তাকে কর্মবাচ্য বলে। যেমন— শিকারি কর্তৃক ব্যাঘ্র নিহত হয়েছে।

১. কর্মবাচ্যে কর্মে প্রথমা, কর্তায় তৃতীয়া বিভক্তি ও দ্বারা দিয়া (দিয়ে), কর্তৃক অনুসর্গের ব্যবহার এবং ক্রিয়াপদ কর্মের অনুসারী হয়। যথা— আলেকজান্ডার কর্তৃক পারস্য দেশ বিজিত হয়। চোরটা ধরা পড়েছে।

২. কখনো কখনো কর্মে দ্বিতীয়া বিভক্তি হতে পারে। যথা— আসামিকে জরিমানা করা হয়েছে।

ভাববাচ্য : যে বাচ্যে কর্ম থাকে না এবং বাক্যে ক্রিয়ার অর্থই বিশেষভাবে ব্যক্ত হয় তাকে ভাববাচ্য বলে।

১. ভাববাচ্যের ক্রিয়া সর্বদাই নাম পুরুষের হয়। ভাববাচ্যের কর্তায় ষষ্ঠী, দ্বিতীয়া অথবা তৃতীয়া বিভক্তি প্রযুক্ত হয়। যেমন—

(ক) আমার (কর্তায় ষষ্ঠী) খাওয়া হলো না।

(নাম পুরুষের ক্রিয়া)

(খ) আমাকে (কর্তায় দ্বিতীয়া) এখন যেতে হবে।

(নাম পুরুষের ক্রিয়া)

(গ) তোমার দ্বারা (কর্তায় তৃতীয়া) এ কাজ হবে না।

(নাম পুরুষের ক্রিয়া)

২. কখনো কখনো ভাববাচ্যে কর্তা উহ্য থাকে, কর্ম দ্বারাই ভাববাচ্য গঠিত হয়। যেমন—

এ পথে চলা যায় না।

এবার ট্রেনে ওঠা যাক।

কোথা থেকে আসা হচ্ছে?

৩. মূল ক্রিয়ার সঙ্গে সহযোগী ক্রিয়ার সংযোগ ও বিভিন্ন অর্থে ভাববাচ্যের ক্রিয়া গঠিত হয়। যেমন— এ ব্যাপারে আমাকে দায়ী করা চলে না। এ রাস্তা আমার চেনা নেই।

বাচ্য পরিবর্তন

কর্তৃবাচ্য থেকে কর্মবাচ্য

নিয়ম : কর্তৃবাচ্যের বাক্যকে কর্মবাচ্যে পরিবর্তিত করতে হলে—

(১) কর্তায় তৃতীয়া (২) কর্মে প্রথমা বা শূন্য বিভক্তি এবং (৩) ক্রিয়া কর্মের অনুসারী হয়।

জ্ঞাতব্য : কর্তৃবাচ্যের ক্রিয়া অকর্মক হলে সেই বাক্যের কর্মবাচ্য হয় না।

কর্তৃবাচ্য

কর্মবাচ্য

(ক) বিদ্বানকে সকলেই আদর করে।

(ক) বিদ্বান সকলের দ্বারা আদৃত হন।

(খ) খোদাতায়ালা বিশ্বজগৎ সৃষ্টি করেছেন।

(খ) বিশ্বজগৎ খোদাতায়ালা কর্তৃক সৃষ্ট হয়েছে।

(গ) মবারক পুস্তক পাঠ করছে।

(গ) মবারক কর্তৃক পুস্তক পঠিত হচ্ছে।

লক্ষণীয় : কর্তৃবাচ্যে ব্যবহৃত তৎসম মিশ্রক্রিয়াটি কর্মবাচ্যে যৌগিক ক্রিয়াজাত ক্রিয়াবিশেষণ রূপে ব্যবহৃত হয়।

কর্তৃবাচ্য থেকে ভাববাচ্য

নিয়ম : কর্তৃবাচ্যের বাক্যকে ভাববাচ্যে পরিবর্তিত করতে হলে—

(১) কর্তায় ষষ্ঠী বা দ্বিতীয়া বিভক্তি হয় এবং (২) ক্রিয়া নাম পুরুষের হয়। যেমন—

কর্তৃবাচ্য

ভাববাচ্য

(ক) আমি যাব না।

(ক) আমার যাওয়া হবে না।

(খ) তুমিই ঢাকা যাবে।

(খ) তোমাকেই ঢাকা যেতে হবে।

(গ) তোমরা কখন এলে?

(গ) তোমাদের কখন আসা হলো?

কর্মবাচ্য থেকে কর্তৃবাচ্য

নিয়ম : কর্মবাচ্যের বাক্যকে কর্তৃবাচ্যে পরিবর্তিত করতে হলে—

(১) কর্তায় প্রথমা, কর্মে দ্বিতীয়া বা শূন্য বিভক্তি প্রযুক্ত হয় এবং (২) ক্রিয়া কর্তা অনুযায়ী হয়। যেমন—

কর্মবাচ্য

কর্তৃবাচ্য

(ক) দস্যুদল কর্তৃক গৃহটি লুণ্ঠিত হয়েছে।

(ক) দস্যুদল গৃহটি লুণ্ঠন করেছে।

(খ) হালাকু খাঁ কর্তৃক বাগদাদ বিধ্বস্ত হয়।

(খ) হালাকু খাঁ বাগদাদ ধ্বংস করেন।

ভাববাচ্য থেকে কর্তৃবাচ্য

নিয়ম : ভাববাচ্যের বাক্যকে কর্তৃবাচ্যে রূপান্তরিত করতে হলে—

(১) কর্তায় প্রথমা বিভক্তি প্রযুক্ত হয় এবং (২) ক্রিয়া কর্তার অনুসারী হয়। যেমন—

ভাববাচ্য

কর্তৃবাচ্য

(ক) তোমাকে হাঁটতে হবে।

(ক) তুমি হাঁটবে।

(খ) এবার একটি গান করা হোক।

(খ) এবার (তুমি) একটি গান কর।

(গ) তার যেন আসা হয়।

(গ) সে যেন আসে।

কর্মকর্তৃবাচ্য

যে বাক্যে কর্মপদই কর্তৃস্থানীয় হয়ে বাক্য গঠন করে, তাকে কর্মকর্তৃবাচ্যের বাক্য বলা হয়। যেমন—

কাজটা ভালো দেখায় না।

বাঁশি বাজে এ মধুর লগনে।

সুতি কাপড় অনেক দিন টেকে।

অনুশীলনী

১। ঠিক উত্তরটিতে টিক (✓) চিহ্ন দাও।

(১) কর্মবাচ্যে কর্তার কোন বিভক্তি হয়?

ক. প্রথমা

গ. দ্বিতীয়া

খ. তৃতীয়া

ঘ. ষষ্ঠী

(২) ভাববাচ্যের কর্তায় কোন বিভক্তি হয়?

ক. ষষ্ঠী

গ. প্রথমা

খ. দ্বিতীয়া

ঘ. ষষ্ঠী বা দ্বিতীয়া

- (৩) কর্তৃবাচ্যে কর্মে কোন বিভক্তি হয়?
ক. দ্বিতীয়া
খ. ষষ্ঠী
গ. শূন্য
ঘ. দ্বিতীয়া, ষষ্ঠী বা শূন্য
- (৪) কর্মবাচ্যে কর্মে কোন বিভক্তি হয়?
ক. প্রথমা
খ. দ্বিতীয়া
গ. তৃতীয়া
ঘ. কখনো প্রথমা, কখনো দ্বিতীয়া
- (৫) দোষী ছাত্রটিকে জরিমানা করা হয়েছে। — এখানে ‘ছাত্রটিকে’ কোন কারকে কোন বিভক্তি?
ক. কর্তায় দ্বিতীয়া
খ. কর্মে দ্বিতীয়া
গ. করণে দ্বিতীয়া
ঘ. অধিকরণে দ্বিতীয়া
- (৬) কর্তৃবাচ্যের ক্রিয়া কী হলে কর্মবাচ্য হয় না?
ক. সমাপিকা
খ. অসমাপিকা
গ. সকর্মক
ঘ. অকর্মক
- (৭) ভাববাচ্যের বাক্যকে কর্তৃবাচ্যে রূপান্তরিত করলে কর্তায় কোন বিভক্তি হয়?
ক. দ্বিতীয়া
খ. প্রথমা
গ. তৃতীয়া
ঘ. ষষ্ঠী
- (৮) ‘করিম পুস্তক পাঠ করছে।’ বাক্যটিকে কর্মবাচ্যে পরিণত করলে হবে—
ক. পুস্তক করিম কর্তৃক পাঠ হচ্ছে। গ. পুস্তক কর্তৃক করিম পঠিত হচ্ছে।
খ. করিম কর্তৃক পুস্তক পঠিত হচ্ছে। ঘ. করিম কর্তৃক পুস্তক পাঠ করছে।
- (৯) তুমি কখন এলে? — বাক্যটিকে ভাববাচ্যে পরিণত করলে কোনটি হবে?
ক. তোমার দ্বারা কখন আসা হলো? গ. তুমি দ্বারা কখন আসা হলো?
খ. তুমি কখন আসা হলো? ঘ. তোমার কখন আসা হলো?
- ২। ‘বাক্যের বিভিন্ন প্রকাশভঙ্গিকেই বাচ্য বলা হয়।’ — এ উক্তিটির সমর্থনে বাক্যের বিভিন্ন প্রকাশভঙ্গির উদাহরণ দাও।
- ৩। কর্তৃবাচ্য ও কর্মবাচ্যের মৌলিক পার্থক্য সৎক্ষেপে বুঝিয়ে লেখ।
- ৪। বাক্যে উদাহরণ দাও।
ক) ভাববাচ্যের কর্তায় ষষ্ঠী, দ্বিতীয়া অথবা তৃতীয়া বিভক্তি হতে পারে।
খ) কর্তৃবাচ্যের ক্রিয়া অকর্মক হলে তার কর্মবাচ্য হয় না।
গ) কর্তৃবাচ্যের তৎসম মিশ্রক্রিয়াটি কর্মবাচ্যে ক্রিয়াজাত বিশেষণ (Participle) – রূপে ব্যবহৃত হয়।

৫। কর্মকর্ত্বাচ্য বলতে কী বোঝ? উদাহরণযোগে বিশদ আলোচনা কর।

৬। বাচ্যান্তর কর।

(ক) কর্ত্বাচ্য থেকে কর্মবাচ্যে

ক) আলেকজান্ডার পারস্য দেশ জয় করেন।

খ) মহাকবি ফেরদৌসী শাহনামা মহাকাব্য রচনা করেছেন।

গ) শিকারি বাঘ মেরেছে।

ঘ) আমি বইটি পড়েছি।

(খ) কর্মবাচ্য থেকে কর্ত্বাচ্যে

ক) কাফেলা দস্যুদল দ্বারা আক্রান্ত হলো।

খ) স্থপতি ঈসা রুমীর তত্ত্বাবধানে তাজমহল নির্মিত হয়েছে।

গ) বেদব্যাস কর্তৃক মহাভারত রচিত হয়েছিল।

ঘ) পিতা কর্তৃক পুত্র বিতাড়িত হয়েছে।

৭। কর্ত্বাচ্যের বাক্যকে ভাববাচ্যে এবং ভাববাচ্যের বাক্যকে কর্ত্বাচ্যে পরিবর্তন কর।

ক) আমি একাই যাব।

খ) এবার একখানা গান হোক।

গ) আজ আর তোমার খাওয়া হবে না।

৮। বাচ্যের ব্যবহারে ভুল থাকলে শুদ্ধ করে লেখ।

ক) পিতা কর্তৃক আমি একটি কলম দান করা হইয়াছি।

খ) আজি নিঝুম রাতে কে বাঁশি বাজে।

গ) তোমার যাওয়া হউক আমি যাওয়া হবে না।

ঘ) ছাত্রগণ তোমাদিগ কর্তৃক ব্যাকরণের পাঠ শূনা হউক।

ঙ) শাসন করা তাকেই সাজে, সোহাগ করে যে।

চতুর্থ পরিচ্ছেদ

উক্তি পরিবর্তন

কোনো কথকের বাক কর্মের নামই উক্তি। উক্তি দুই প্রকার : প্রত্যক্ষ উক্তি ও পরোক্ষ উক্তি।

যে বাক্যে বক্তার কথা অবিকল উদ্ভূত হয়, তাকে প্রত্যক্ষ উক্তি বলে। যথা – তিনি বললেন, “বইটা আমার দরকার।”

যে বাক্যে বক্তার উক্তি অন্যের জবানিতে রূপান্তরিতভাবে প্রকাশিত হয়, তাকে পরোক্ষ উক্তি বলা হয়। যথা : তিনি বললেন যে বইটা তাঁর দরকার।

উক্তি পরিবর্তনের নিয়ম

১. প্রত্যক্ষ উক্তিতে বক্তার বক্তব্যটুকু উদ্ভরণ চিহ্নের (“ ”) অন্তর্ভুক্ত থাকে। পরোক্ষ উক্তিতে উদ্ভরণ চিহ্ন লোপ পায়। প্রথম উদ্ভরণ চিহ্ন স্থানে ‘যে’ এই সংযোজক অব্যয়টি ব্যবহার করতে হয়। বাক্যের সঙ্গতি রক্ষার জন্য উক্তিতে ব্যবহৃত বক্তার পুরুষের পরিবর্তন করতে হয়। যেমন–

প্রত্যক্ষ উক্তি : খোকা বলল, “আমার বাবা বাড়ি নেই।”

পরোক্ষ উক্তি : খোকা বলল যে, তার বাবা বাড়ি ছিলেন না।

২. বাক্যের অর্থ–সঙ্গতি রক্ষার জন্য সর্বনামের পরিবর্তন করতে হয়। যেমন–

প্রত্যক্ষ উক্তি : রশিদ বলল, “আমার ভাই আজই ঢাকা যাচ্ছেন।”

পরোক্ষ উক্তি : রশিদ বলল যে, তার ভাই সেদিনই ঢাকা যাচ্ছিলেন।

৩. প্রত্যক্ষ উক্তির কালবাচক পদকে পরোক্ষ উক্তিতে অর্থ অনুসারী করতে হয়। যেমন–

প্রত্যক্ষ উক্তি : শিক্ষক বললেন, “কাল তোমাদের ছুটি থাকবে।”

পরোক্ষ উক্তি : শিক্ষক বললেন যে, পরদিন আমাদের ছুটি থাকবে।

৪. প্রত্যক্ষ উক্তির বাক্যের সর্বনাম এবং কালসূচক শব্দের পরোক্ষ উক্তিতে নিম্নলিখিত পরিবর্তন সংঘটিত হয়।

প্রত্যক্ষ	পরোক্ষ	প্রত্যক্ষ	পরোক্ষ	প্রত্যক্ষ	পরোক্ষ
এই	সেই	আগামীকাল	পরদিন	এখানে	সেখানে
ইহা	তাহা	গতকাল	আগেরদিন	এখন	তখন
এ	সে	গতকাল্য	পূর্বদিন		
আজ	সেদিন	ওখানে	ঐখানে		

- ক) প্রত্যক্ষ উক্তি : ছেলে লিখেছিল, “শহরে খুব গরম পড়েছে।”

পরোক্ষ উক্তি : ছেলে লিখেছিল যে, শহরে খুব গরম পড়েছিল।

অথবা, ছেলে লিখেছিল শহরে খুব গরম পড়েছে।

খ) প্রত্যক্ষ উক্তি : করিম বলেছিল, “আমি বাজারে যাচ্ছি।”

পরোক্ষ উক্তি : করিম বলেছিল যে, সে বাজারে যাচ্ছে।

গ) প্রত্যক্ষ উক্তি : মনসুর বলল, “আমি ঢাকা যাব।”

পরোক্ষ উক্তি : মনসুর বলল যে, সে ঢাকা যাবে।

প্রত্যক্ষ উক্তিতে কোনো চিরন্তন সত্যের উদ্ঘৃতি থাকলে পরোক্ষ উক্তিতে কালের কোনো পরিবর্তন হয় না। যেমন—

ক) প্রত্যক্ষ উক্তি : শিক্ষক বললেন, “পৃথিবী গোলাকার।”

পরোক্ষ উক্তি : শিক্ষক বললেন যে, পৃথিবী গোলাকার।

খ) প্রত্যক্ষ উক্তি : বৈজ্ঞানিক বললেন, “চুম্বক লোহাকে আকর্ষণ করে।”

পরোক্ষ উক্তি : বৈজ্ঞানিক বললেন যে, চুম্বক লোহাকে আকর্ষণ করে।

৭। প্রশ্নবোধক, অনুজ্ঞাসূচক ও আবেগসূচক প্রত্যক্ষ উক্তিকে পরোক্ষ উক্তিতে পরিবর্তন করতে হলে প্রধান খণ্ডবাক্যের ক্রিয়াকে ভাব অনুসারে পরিবর্তন করতে হয়। যেমন—

প্রশ্নবোধক বাক্য

ক) প্রত্যক্ষ উক্তি : শিক্ষক বললেন, “তোমরা কি ছুটি চাও?”

পরোক্ষ উক্তি : আমরা ছুটি চাই কি না, শিক্ষক তা জিজ্ঞাসা করলেন।

খ) প্রত্যক্ষ উক্তি : বাবা বললেন, “কবে নাগাদ তোমাদের ফল বের হবে?”

পরোক্ষ উক্তি : আমাদের ফল কবে নাগাদ বের হবে, বাবা তা জ্ঞানতে চাইলেন।

অনুজ্ঞাসূচক বাক্য

ক) প্রত্যক্ষ উক্তি : হামিদ বলল, “তোমরা আগামীকাল এসো।”

পরোক্ষ উক্তি : হামিদ তাদের পরদিন আসতে (বা যেতে) বলল।

খ) প্রত্যক্ষ উক্তি : তিনি বললেন, “দয়া করে ভেতরে আসুন।”

পরোক্ষ উক্তি : তিনি (আমাকে) ভেতরে যেতে অনুরোধ করলেন।

আবেগসূচক বাক্য

ক) প্রত্যক্ষ উক্তি : লোকটি বলল, “বাঃ! পাখিটি তো চমৎকার।”

পরোক্ষ উক্তি : লোকটি আনন্দের সাথে বলল যে, পাখিটি চমৎকার।

খ) প্রত্যক্ষ উক্তি : ভিখারিনী দুঃখের সাথে বলল, “শীতে আমরা কতই না কষ্ট পাচ্ছি।”

পরোক্ষ উক্তি : ভিখারিনী দুঃখের সাথে বলল যে, তারা শীতে বড়ই কষ্ট পাচ্ছে।

অনুশীলনী

১। প্রত্যেকটি প্রশ্নের চারটি উত্তর দেওয়া হয়েছে। সর্বোত্তমটিতে টিক (✓) চিহ্ন দাও।

(১) খোকা তোমাকে বলল, “আমার বাবা বাড়ি নেই।” এর পরোক্ষ উক্তি হবে—

ক. খোকা তোমাকে বলল যে, তার বাবা বাড়ি নেই।

খ. খোকা তোমাকে বলল যে, তার বাবা বাড়ি ছিলেন না।

গ. খোকা তোমাকে বলল যে তোমার বাবা বাড়ি নেই।

ঘ. খোকা তোমাকে বলল যে, আমার বাবা বাড়ি ছিলেন না।

(২) রহমান আমাকে বলল, “আমি এক্ষুণি আসছি।” — পরোক্ষ উক্তি হবে—

ক. রহমান আমাকে বলল যে আমি এক্ষুণি যাচ্ছি

খ. রহমান আমাকে বলল যে সে এক্ষুণি আসছে।

গ. রহমান আমাকে বলল যে, তুমি তক্ষুণি যাচ্ছ।

ঘ. রহমান আমাকে বলল যে সে তক্ষুণি যাচ্ছে।

(৩) হামিদ বলল, “তোমরা আগামীকাল এসো।” — পরোক্ষ উক্তি হবে—

ক. হামিদ তাদের পরদিন আসতে বলল।

খ. হামিদ তাদের বলল যে তারা যেন আগামীকাল আসে।

গ. হামিদ বলল যে তোমরা পরদিন এসো।

ঘ. হামিদ তাদের বলল যে তারা যেন পরদিন আসে।

(৪) করিম তোমাকে বলল, “আমি গতকাল ঢাকা গিয়েছিলাম।” — পরোক্ষ উক্তি কী হবে?

ক. করিম তোমাকে বলল যে সে গতকাল ঢাকা গিয়েছিল।

খ. করিম তোমাকে বলল যে সে আজ ঢাকা গিয়েছিল।

গ. করিম তোমাকে বলল যে, তুমি গতকাল ঢাকা গিয়েছিলে।

ঘ. করিম তোমাকে বলল যে সে আগেরদিন ঢাকা গিয়েছিল।

(৫) রেবা আমাকে বলল, “ভাই, তুমি কবে এখানে আসবে?” — পরোক্ষ উক্তি হবে—

ক. রেবা আমাকে ভাই সম্বোধন করে বলল যে আমি কবে এখানে আসব।

খ. রেবা আমাকে ভাই সম্বোধন করে জ্ঞানতে চাইল যে আমি কবে সেখানে যাব।

গ. রেবা আমাকে ভাই সম্বোধন করে বলল যে আমি কবে সেখানে যাব।

ঘ. রেবা আমাকে বলল, তুমি কবে সেখানে আসবে।

- ২। উক্তি বলতে কী বোঝ? উক্তি কয় প্রকার ও কী কী?
- ৩। প্রত্যক্ষ উক্তিকে পরোক্ষ উক্তিতে পরিবর্তিত করতে হলে নিম্নলিখিত বিশেষ স্থলে যে পরিবর্তন সংঘটিত হয়, তা পাশাপাশি লিখে শূন্যস্থান পূরণ কর।
- (ক) প্রত্যক্ষ উক্তি..... উঠে যায় এবং প্রথম উদ্ভরণ চিহ্ন স্থানে সংযোজক অব্যয়টি বসাতে হয়।
- (খ) প্রত্যক্ষ উক্তির সর্বনাম পদ পরোক্ষ উক্তিতে বাক্যের..... রক্ষা করে পরিবর্তন করতে হয়।
- (গ) প্রত্যক্ষ উক্তির স্থানবাচক ও কালবাচক শব্দ পরোক্ষ উক্তিতে..... হয়।
- (ঘ) প্রত্যক্ষ উক্তির প্রধান খণ্ডবাক্যের ক্রিয়া বর্তমান বা ভবিষ্যৎ কালের হলে পরোক্ষ উক্তিতে তা.....
..... কালের কিংবা..... কালেরও হতে পারে।
- ৪। সংক্ষেপে জবাব দাও : প্রত্যক্ষ উক্তির কোন কোন স্থলে পরোক্ষ উক্তিতে কোনো পরিবর্তন হয় না?
- ৫। নিম্নলিখিত প্রত্যক্ষ উক্তিগুলো পরোক্ষ উক্তিতে পরিবর্তন কর।
- (ক) সে বলল, “তা কি হয়? তোমাকে এখন যেতে দিচ্ছে কে? দয়া করে আমার সঙ্গে চল।”
- (খ) সেনাপতি বললেন, “মহারাজ আমরা থাকতে আপনি কেন যুদ্ধে যাবেন? আজই শত্রুদের বন্দি করে আনব। অনুগ্রহ করে আপনি আমাদের যেতে অনুমতি দিন।”
- (গ) শিক্ষক বললেন, “পৃথিবী গোলাকার। পৃথিবীর মাধ্যাকর্ষণ শক্তির জন্যই ফল মাটিতে পড়ে।”
- (ঘ) মা বললেন, “সুমন, দেরি না করে চলে এসো। পড়তে বসো। মন দিয়ে পড়ো। কাল তোমার পরীক্ষা মনে নেই?”
- (ঙ) নিন্দুক লক্ষ্মীছাড়া রটাইল, “পাখি মরিয়াছে।” ভাগিনাকে ডাকিয়া রাজা বলিলেন, “ভাগিনা, কী কথা শুন।” ভাগিনা বলিল, “মহারাজ, পাখিটার শিক্ষা পুরা হইয়াছে।” রাজা শুধাইলেন, “ও কি আর লাফায়?” ভাগিনা বলিল, “আরে রাম।” “আর কি উড়ে?” “না।” “দানা না পাইলে আর কি চৈঁচায়?” “না।” রাজা বলিলেন, “একবার পাখিটাকে আন দেখি।”

পঞ্চম পরিচ্ছেদ
যতি বা ছেদচিহ্নের লিখন কৌশল

বাক্যের অর্থ সুস্পষ্টভাবে বোঝার জন্য বাক্যের মধ্যে বা বাক্যের সমাপ্তিতে কিংবা বাক্যে আবেগ (হর্ষ, বিষাদ), জিজ্ঞাসা ইত্যাদি প্রকাশ করার উদ্দেশ্যে বাক্য-গঠনে যেভাবে বিরতি দিতে হয় এবং লেখার সময় বাক্যের মধ্যে তা দেখানোর জন্য যেসব সাংকেতিক চিহ্ন ব্যবহার করা হয়, তা-ই যতি বা ছেদচিহ্ন।

নিচে বিভিন্ন প্রকার যতিচিহ্নের নাম, আকৃতি এবং তাদের বিরতি কালের পরিমাণ নির্দেশিত হলো:

যতিচিহ্নের নাম	আকৃতি	বিরতি-কাল-পরিমাণ
কমা	,	১ (এক) বলতে যে সময় প্রয়োজন।
সেমিকোলন	;	১ বলার দ্বিগুণ সময়।
দাঁড়ি (পূর্ণচ্ছেদ)		এক সেকেন্ড।
প্রশ্নবোধক চিহ্ন	?	ঐ
বিস্ময় ও সম্বোধন চিহ্ন	!	ঐ
কোলন	:	ঐ
ড্যাস	—	ঐ
কোলন ড্যাস	: -	ঐ
হাইফেন	-	থামার প্রয়োজন নেই।
ইলেক বা লোপ চিহ্ন	,	থামার প্রয়োজন নেই।
উদ্ঘরণ চিহ্ন	“ ”	‘এক’ উচ্চারণে যে সময় লাগে।
ব্র্যাকেট (বন্ধনী-চিহ্ন)	()	থামার প্রয়োজন নেই।
	{ }	থামার প্রয়োজন নেই।
	[]	থামার প্রয়োজন নেই।

যতি বা ছেদচিহ্নের ব্যবহার

১. কমা {পাদচ্ছেদ (,)}

ক) বাক্য পাঠকালে সুস্পষ্টতা বা অর্থ-বিভাগ দেখানোর জন্য যেখানে স্বল্প বিরতির প্রয়োজন, সেখানে কমা ব্যবহৃত হয়। যেমন— সুখ চাও, সুখ পাবে পরিশ্রমে।

- খ) পরস্পর সম্বন্ধযুক্ত একাধিক বিশেষ্য বা বিশেষণ পদ একসঙ্গে বসলে শেষ পদটি ছাড়া বাকি সবগুলোর পরই কমা বসবে। যেমন— সুখ, দুঃখ, আশা, নৈরাশ্য একই মালিকার পুষ্প।
- গ) সম্বোধনের পরে কমা বসাতে হয়। যেমন— রশিদ, এদিকে এসো।
- ঘ) জটিল বাক্যের অন্তর্গত প্রত্যেক খণ্ডবাক্যের পরে কমা বসবে। যেমন— কাল যে লোকটি এসেছিল, সে আমার পূর্বপরিচিত।
- ঙ) উদ্ভরণ চিহ্নের পূর্বে (খণ্ডবাক্যের শেষে) কমা বসাতে হবে। যেমন— সাহেব বললেন, “ছুটি পাবেন না।”
- চ) মাসের তারিখ লিখতে বার ও মাসের পর ‘কমা’ বসবে। যেমন— ১৬ই পৌষ, বুধবার, ১৩৯৯ সন।
- ছ) বাড়ি বা রাস্তার নম্বরের পরে কমা বসবে। যেমন— ৬৮, নবাবপুর রোড, ঢাকা-১০০০।
- জ) নামের পরে ডিগ্রিসূচক পরিচয় সংযোজিত হলে সেগুলোর প্রত্যেকটির পরে কমা বসবে। যেমন—
ডক্টর মুহম্মদ এনামুল হক, এম.এ. পি-এইচ.ডি।

২. সেমিকোলন (;)

কমা অপেক্ষা বেশি বিরতির প্রয়োজন হলে, সেমিকোলন বসে। যথা— সংসারের মায়াজালে আবদ্ধ আমরা; এ মায়ার বাঁধন কি সত্যিই দুঃস্থদ্য?

৩. দাঁড়ি বা পূর্ণচ্ছেদ (!)

বাক্যের পরিসমাপ্তি বোঝাতে দাঁড়ি বা পূর্ণচ্ছেদ ব্যবহার করতে হয়। যথা— শীতকালে এ দেশে আবহাওয়া শুষ্ক থাকে।

৪. প্রশ্নবোধক চিহ্ন (?)

বাক্যে কোনোকিছু জিজ্ঞাসা করা হলে বাক্যের শেষে প্রশ্নবোধক চিহ্ন বসে। যেমন— তুমি এখন এলে? সে কি যাবে?

৫. বিস্ময় ও সম্বোধন চিহ্ন (!)

হৃদয়াবেগ প্রকাশ করতে হলে এ সম্বোধন পদের পরে (!) চিহ্নটি বসে। যেমন—

আহা! কী চমৎকার দৃশ্য।

জননী! আজ্ঞা দেহ মোরে যাই রণস্থলে।

কিন্তু আধুনিক নিয়মে সম্বোধন স্থলে কমা চিহ্নের ব্যবহার করা হয়।

৬. কোলন (:)

একটি অপূর্ণ বাক্যের পরে অন্য একটি বাক্যের অবতারণা করতে হলে কোলন ব্যবহৃত হয়। যেমন—

সভায় সাব্যস্ত হলো : একমাস পরে নতুন সভাপতির নির্বাচন অনুষ্ঠিত হবে।

৭। ড্যাস চিহ্ন (—)

যৌগিক ও মিশ্র বাক্যে পৃথক ভাবাপন্ন দুই বা তার বেশি বাক্যের সমন্বয় বা সংযোগ বোঝাতে ড্যাস চিহ্ন ব্যবহৃত হয়। যেমন—

তোমরা দরিদ্রের উপকার কর— এতে তোমাদের সম্মান যাবে না—বাড়বে।

উদাহরণ বা দৃষ্টান্ত প্রয়োগ করতে হলে কোলন এবং ড্যাস চিহ্ন একসঙ্গে ব্যবহৃত হয়। যেমন—পদ পাঁচ প্রকার:—

বিশেষ্য, বিশেষণ, সর্বনাম, অব্যয় ও ক্রিয়া।

৮. হাইফেন বা সংযোগ চিহ্ন (—)

সমাসবন্ধ পদের অংশগুলো বিচ্ছিন্ন করে দেখানোর জন্য হাইফেনের ব্যবহার হয়। যেমন— এ আমাদের শ্রদ্ধা—অভিনন্দন, আমাদের প্রীতি—উপহার।

৯. ইলেক (') বা লোপ চিহ্ন

কোনো বর্ণ বিশেষের লোপ বোঝাতে বিলুপ্ত বর্ণের জন্য (') লোপচিহ্ন দেওয়া হয়। যেমন—

মাথার 'পরে জ্বলছে রবি ('পরে=ওপরে)

পাগড়ি বাঁধা যাচ্ছে কা'রা? (কা'রা=কাহারো)

১০. উদ্ধরণ চিহ্ন (“ ”)

বক্তার প্রত্যক্ষ উক্তিকে এই চিহ্নের অন্তর্ভুক্ত করতে হয়। যথা—শিক্ষক বললেন, “গতকাল তুরস্কে ভয়ানক ভূমিকম্প হয়েছে।”

১১. ব্র্যাকেট বা বন্ধনী চিহ্ন (), { }, []

এই তিনটি চিহ্নই গণিতশাস্ত্রে ব্যবহৃত হয়। তবে প্রথম বন্ধনীটি বিশেষ ব্যাখ্যামূলক অর্থে সাহিত্যে ব্যবহৃত হয়ে থাকে। যেমন— ত্রিপুরায় (বর্তমানে কুমিল্লা) তিনি জন্মগ্রহণ করেন।

ব্যাকরণিক চিহ্ন

বিশেষভাবে ব্যাকরণে নিম্নলিখিত চিহ্নগুলো ব্যবহৃত হয়।

(ক) ধাতু বোঝাতে (√) চিহ্ন : √স্থা =স্থা ধাতু।

(খ) পরবর্তী শব্দ থেকে উৎপন্ন বোঝাতে (<) চিহ্ন: জাঁদরেল < জেনারেল।

(গ) পূর্ববর্তী শব্দ থেকে উৎপন্ন বোঝাতে (>) চিহ্ন: গজা > গাঙ।

(ঘ) সমানবাচক বা সমস্তবাচক বোঝাতে সমান (=) চিহ্ন : নর ও নারী = নরনারী।

অনুশীলনী

১। প্রত্যেকটি প্রশ্নের চারটি উত্তরের মধ্যে সর্বোত্তমটিতে টিক (✓) চিহ্ন দাও।

(i) বাক্যে কমা (,) থাকলে কতক্ষণ থামতে হয়?

- | | |
|--------------------------|-------------------------|
| ক. $\frac{1}{2}$ সেকেন্ড | গ. এক সেকেন্ড |
| খ. $\frac{6}{8}$ সেকেন্ড | ঘ. এক বলতে যে সময় লাগে |

(ii) বাক্যে সেমিকোলন (;) থাকলে কতক্ষণ থামতে হয়?

- | | |
|--------------------------------------|----------------------------|
| ক. ১ বলতে যে সময় লাগে | গ. ১ সেকেন্ড |
| খ. ১ $\frac{1}{2}$ বলার দ্বিগুণ সময় | ঘ. ২ $\frac{1}{2}$ সেকেন্ড |

(iii) বাক্যের শেষে দাঁড়ির পর কতক্ষণ থেমে পরের বাক্য পড়তে হয়?

- | | |
|----------------------------|--------------|
| ক. ১ সেকেন্ড | গ. ২ সেকেন্ড |
| খ. ১ $\frac{1}{2}$ সেকেন্ড | ঘ. সেকেন্ড |

(iv) হাইফেন (–)–এরপর কতক্ষণ থামতে হয়?

- | | |
|----------------------------|------------------------|
| ক. ১ সেকেন্ড | গ. ২ সেকেন্ড |
| খ. ১ $\frac{1}{2}$ সেকেন্ড | ঘ. থামার প্রয়োজন নেই। |

(v) সম্বোধনের পর কোন চিহ্ন বসে?

- | | |
|-------------|--------------------|
| ক. সেমিকোলন | গ. দাঁড়ি |
| খ. কমা | ঘ. কোনো চিহ্নই নয় |

(vi) ধাতু বোঝাতে কোন চিহ্ন বসে?

- | | |
|------|------|
| ক. < | গ. ✓ |
| খ. – | ঘ. > |

(vii) পূর্ববর্তী শব্দ থেকে উৎপন্ন বোঝাতে কোন চিহ্ন বসে?

- | | |
|------|------|
| ক. > | গ. ✓ |
| খ. < | ঘ. : |

(viii) পরবর্তী শব্দ থেকে উৎপন্ন বোঝাতে কোন চিহ্ন বসে?

- | | |
|------|------|
| ক. ✓ | গ. > |
| খ. : | ঘ. < |

- ২। যতিচিহ্ন বা ছেদচিহ্ন বলতে কী বোঝ? বাংলা ভাষায় যতিচিহ্নের আবশ্যিকতা কী? সংক্ষেপে আলোচনা কর।
- ৩। আমরা বাক্য গঠনের ক্ষেত্রে কী কী ছেদচিহ্নের ব্যবহার করে থাকি? প্রত্যেকটি চিহ্নের নাম, রূপ এবং তজ্জনিত বিরামের কাল-পরিমাণ নির্দেশ কর।
- ৪। স্বরচিত বাক্যে ব্যবহার দেখাও :
- (ক) বিস্ময় চিহ্ন ও সম্বোধন চিহ্ন (গ) ড্যাস চিহ্ন ও হাইফেন চিহ্ন
- (খ) উদ্ভরণ চিহ্ন ও লোপ চিহ্ন (ঘ) ধাতুর চিহ্ন ও সমানবাচক চিহ্ন।
- ৫। সংক্ষেপে জবাব দাও :
- (ক) কোলন ও কোলন-ড্যাস চিহ্ন ব্যবহারের পার্থক্য কী?
- (খ) সন্দেহ বা ব্যঙ্গ বোঝাতে তুমি কোন প্রকারের যতিচিহ্নের ব্যবহার করবে?
- (গ) কোন কোন ক্ষেত্রে কমা চিহ্ন ব্যবহার করতে হয়?
- ৬। নিম্নলিখিত অনুচ্ছেদটিতে যতিচিহ্ন বসিয়ে আবার লেখ।

প্রভাত হলো সোহরাব ময়দানে এসে হাঁকলেন ইরানশাহ কায়কাউস আমি প্রতিশোধ নিতে এসেছি ইরান শাহ চুপ কেন উত্তম তবে কি ইরানী ফৌজে এমন পাহলোয়ান নেই যে আমার সঙ্গে অস্ত্র পরীক্ষা করতে পারে।

ষষ্ঠ পরিচ্ছেদ বাক্যের শ্রেণিবিভাগ

স্বরভঙ্গি ও বাগ্ভঙ্গি

১. অ-নে-ক অ-নে-ক দিন আগে বাংলাদেশে বিজয় সিংহ নামে খুব সাহসী এক রাজপুত্র ছিলেন।
২. প্রকৃতি কী সুন্দর সাজেই না সেজেছে!
৩. তাজ্জব ব্যাপার!
৪. দুঃখ বিনা সুখ লাভ হয় কি মহীতে?
৫. ‘আমার মাথা নত করে দাও হে তোমার চরণধুলার তলে।’
৬. ‘দীর্ঘজীবী হও।’
৭. ‘সবারে বাস রে ভালো।’
৮. উঠে বস।

ওপরের প্রথম বাক্যটি বিবৃতিমূলক; দ্বিতীয় ও তৃতীয় বাক্য দুটি বিস্ময়সূচক; চতুর্থ বাক্যটি প্রশ্নসূচক; পঞ্চম বাক্যটি প্রাৰ্থনামূলক; ষষ্ঠ বাক্যটি আশীৰ্বাদবোধক; সপ্তম বাক্যটি অনুরোধমূলক; অষ্টম বাক্যটি আদেশসূচক।

হাসি-কান্না, সুখ-দুঃখ, আবেগ-উচ্ছ্বাস, অনুরোধ-প্রাৰ্থনা, আদেশ-মিনতি, শাসন-তিরস্কার কণ্ঠস্বরের নানা ভঙ্গিতে উচ্চারণের মধ্যে প্রকাশিত হয়।

বিশেষ জোর দিয়ে কথা বলা, কণ্ঠস্বরের ওঠা-নামা, কাঁপন, টেনে টেনে শব্দ উচ্চারণ ইত্যাদির দ্বারা বাক্যের বিশেষ বিশেষ অর্থ ও ভাব প্রকাশ করা সম্ভব। বিভিন্ন ভঙ্গিতে কণ্ঠধ্বনি উচ্চারণের ফলে যে ধ্বনি-তরঙ্গ সৃষ্টি হয়, তা নানা প্রকার ভাব ও অর্থ সৃষ্টি করে। এই ধ্বনি-তরঙ্গ বা স্বরতরঙ্গকে স্বরভঙ্গি বলে। এই স্বরভঙ্গিই বাগ্ভঙ্গির ভিত্তি।

স্বরভঙ্গির দ্বারা যে শব্দ ও বাক্য সৃষ্টি ও উচ্চারিত হয়, তাকে লিখিত আকারে এবং উচ্চারিত অবস্থায় বাগ্ভঙ্গি বলা যেতে পারে।

বাক্য নিম্নলিখিত কয়েকটি শ্রেণিতে বিভক্ত হতে পারে।

১. বিবৃতিমূলক বাক্য (Assertive sentence) : সাধারণভাবে হ্যাঁ বা না বাচক বাক্য। বিবৃতিমূলক বাক্য দুই প্রকার হতে পারে : হ্যাঁ বাচক বাক্য (Affirmative sentence) এবং না বাচক বাক্য (Negative sentence)।

উদাহরণ-হ্যাঁ বাচক বাক্য : সে ঢাকা যাবে। আমি বলতে চাই।

না বাচক বাক্য : সে ঢাকা যাবে না। আমি বলতে চাই না।

২. প্রশ্নসূচক বাক্য (Interrogative sentence) : এ ধরনের বাক্যে প্রশ্ন জিজ্ঞাসা করা হয়। যথা :

কোথায় যাচ্ছ? কী পড়ছ? কেন এসেছ? যাবে নাকি?

৩. বিস্ময়সূচক বাক্য (Exclamatory sentence) : যে বাক্যে আশ্চর্যজনক কিছু বোঝায় তাকে বিস্ময়সূচক বাক্য বলে। যথা :

তাজ্জব ব্যাপার! সমুদ্রের সে কী ভীষণ গর্জন, ঢেউগুলো পাহাড়ের চূড়ার মতো উঁচু— আমি তো ভয়ে মরি! হুররে, আমরা জিতেছি!

৪. ইচ্ছাসূচক বাক্য (Optative sentence) : এ ধরনের বাক্যে শুভজনক প্রার্থনা, আশিস, আকাঙ্ক্ষা করা হয়। যথা :

তোমার মজল হোক। ঈশ্বর তোমাকে জয়ী করুন। পরীক্ষায় সফল হও। দীর্ঘজীবী হও।

৫. আদেশ বাচক বাক্য (Imperative sentence) : এ ধরনের বাক্যে আদেশ করা হয়। যথা :

শিক্ষক মহোদয় শ্রেণিকক্ষে এলে উঠে দাঁড়াবে। চুপটি করে বস। উঠে দাঁড়াও। দেশের স্বাধীনতা রক্ষার জন্য যুদ্ধ কর।

স্বরভক্তি তথা বাগ্ভক্তির সাহায্যে ক্রোধ, আদর, আনন্দ, দুঃখ, বিরক্তি, বিস্ময়, লজ্জা, ঘৃণা প্রভৃতি বিভিন্ন প্রকার অনুভূতি প্রকাশ করা যায়। যথা :

১. সাধারণ বিবৃতিতে : সে আজ যাবে।
২. জিজ্ঞাসায় : সে আজ যাবে?
৩. বিস্ময় প্রকাশে : সে আজ যাবে!
৪. ক্রোধ প্রকাশে : আমি তোমাকে দেখে নেব।
৫. আদর বোঝাতে : বড্ড শুকিয়ে গেছিস রে।
৬. আনন্দ প্রকাশে : বেশ বেশ, খুব ভালো হয়েছে!
৭. দুঃখ প্রকাশে : আহা, গাছ থেকে পড়ে পা ভেঙেছে!
৮. বিরক্তি প্রকাশে : আঃ, ভালো লাগছে না, এখন এখান থেকে যাও তো।
৯. ভীতি প্রদর্শনে : যাবি কি না বল?
১০. লজ্জা প্রকাশে : ছিঃ ছিঃ, তার সঙ্গে পারলে না।
১১. ধিক্কার দিতে : ছিঃ, তোমার এই কাজ!
১২. ঘৃণা প্রকাশে : তুমি এত নীচ!
১৩. অনুরোধ প্রকাশে : কাজটি করে দাও না ভাই।
১৪. প্রার্থনা : ঈশ্বর তোমার মজল করুন।

ছেদ ও বিরতিসূচক চিহ্নগুলো বাগ্ভক্তির লিখিত আকার প্রকাশে সাহায্য করে। দাঁড়ি, কমা, প্রশ্নবোধক ও বিস্ময়সূচক চিহ্ন বাক্যের ভাব ও অর্থবোধের জন্য উপকারক।

অনুশীলনী

১। চারটি উত্তরের সর্বোত্তমটিতে টিক (✓) চিহ্ন দাও :

(১) কোনটি আদেশসূচক বাক্য?

ক. তোমাকে বসতে বলছি।

গ. তুমি কি বসবে?

খ. এখানে এস।

ঘ. বসলে খুশি হব

(২) “সে কি যাবে” –এটি কী ধরনের বাক্য?

ক. আদেশসূচক

গ. বিবৃতিমূলক

খ. বিষয়সূচক

ঘ. প্রশ্নসূচক

(৩) “আমি তোমাকে স্নেহ করি।” এটি কী ধরনের বাক্য?

ক. প্রশ্নসূচক

গ. বিষয়সূচক

খ. বিবৃতিমূলক

ঘ. আদেশমূলক?

(৪) কোনটি প্রশ্নসূচক বাক্য?

ক. কী খেলাই খেললে

গ. আমি খেলব না

খ. তুমি অবশ্যই খেলবে

গ. তুমি কি খেলেছ

(৫) “তোমাকে আজই যেতে হবে।” এটা কী ধরনের বাক্য?

ক. বিষয়সূচক

গ. আদেশসূচক

খ. প্রার্থনামূলক

ঘ. বিবৃতিমূলক

(৬) “কী সাংঘাতিক ব্যাপার।” – এটা কী ধরনের বাক্য?

ক. বিবৃতিমূলক

গ. প্রশ্নমূলক

খ. বিষয়সূচক

ঘ. অনুরোধবাচক

(৭) “কোথায় যাচ্ছ?” – এটা কী ধরনের বাক্য ?

ক. বিষয়সূচক

গ. প্রশ্নমূলক

খ. বিবৃতিমূলক

ঘ. অনুরোধমূলক

(৮) “এখানে এসো।”- এটা কী ধরনের বাক্য ?

ক. অনুরোধজ্ঞাপক

গ. বিবৃতিমূলক

খ. আদেশমূলক

ঘ. বিস্ময়সূচক

(৯) বাগ্‌ভঙ্গি কী?

ক. শব্দভঙ্গি

গ. নানা ভঙ্গিতে উচ্চারণ

খ. বাক্যভঙ্গি

ঘ. মুখভঙ্গি

(১০) কোনটি বিস্ময়সূচক বাক্য?

ক. কী করবে?

গ. সকলের মজাল হোক।

খ. জয়ী হও।

ঘ. কী সুন্দর ফুল!

২। স্বরভঙ্গি কাকে বলে ?

৩। বাগ্‌ভঙ্গি বলতে কী বোঝ?

৪। বাগ্‌ভঙ্গি অনুযায়ী কয় প্রকার বাক্য গঠন সম্ভব?

৫। বাগ্‌ভঙ্গির সাহায্যে কী কী ধরনের বাক্য গঠন করা যায়?

৬। আদেশসূচক বাক্য কাকে বলে? উদাহরণ দাও।

৭। বিস্ময়সূচক বাক্য বলতে কী বোঝ? এ ধরনের দুটি বাক্যের উদাহরণ দাও।

৮। বিবৃতিমূলক বাক্য কাকে বলে? এ ধরনের বাক্য কয় প্রকার ও কী কী? উদাহরণসহ লেখ।

৯। প্রার্থনামূলক বাক্য কাকে বলে উদাহরণসহ লেখ।

১০। ক্রোধ প্রকাশক এবং আনন্দবাচক বাক্যের উদাহরণ দাও।

সপ্তম পরিচ্ছেদ
বাক্যে পদ সংস্থাপনার ক্রম
(Syntax)

বাক্যের অন্তর্ভুক্ত পদগুলো উপযুক্ত স্থানে বসানোই পদ সংস্থাপনার ক্রম। একে কেউ কেউ পদক্রম বলে থাকেন।

নিয়মাবলি

১. সাধারণ বাক্যের প্রথমে সম্প্রসারকসহ উদ্দেশ্য (বা কর্তা) এবং বাক্যের শেষে সম্প্রসারকসহ বিধেয় (বা ক্রিয়াপদ) বসবে। যেমন –

মনোযোগী	ছাত্ররাই	রীতিমত	পড়াশোনা করে।
(সম্প্রসারক)	কর্তৃপদ	(সম্প্রসারক)	(ক্রিয়াপদ)

কিন্তু বাক্যকে শক্তিশালী করার জন্য এর ব্যতিক্রমও হতে পারে। যেমন –

লোকটি ছিল অত্যন্ত চতুর।

২. সম্বন্ধ পদ বিশেষ্যের পূর্বে বসবে। যেমন – “ঘরের ছেলে ঘরে ফিরে এসেছে।”

অর্থ সজ্জাতি রক্ষার জন্য বা ছন্দের অনুরোধে সম্বন্ধ পদ পরেও বসতে পারে। যেমন –

“হে আদি জননী সিন্ধু, বসুন্ধরা সন্তান তোমার।”

৩. কারক-বিভক্তিযুক্ত পদ বা অসমাপিকা ক্রিয়াপদ বিশেষণের আগে বসে। যেমন –

লোকটি ব্যবহারে খুবই ভদ্র। রাজশাহীর আম খেতে চমৎকার।

৪. বিধেয় বিশেষণ সর্বদাই বিশেষ্যের পরে বসে। যথা : লোকটি যে জ্ঞানী তাতে সন্দেহ নেই।

৫. বাক্যের প্রথমে কর্তা, পরে কর্ম এবং শেষে ক্রিয়াপদ বসে। যেমন – আমি ‘শাহনামা’ পড়েছি।

(ক) কবিতায় এর ব্যতিক্রম হতে পারে। যেমন – ‘লহ নমস্কার, সুন্দর আমার।’

(খ) বাক্যে জোর দিতে গেলে নিয়মের ব্যতিক্রম হতে পারে। যেমন – জানি, তোমার মুরোদ কতটুকু।

৬. বহুপদময় বিশেষণ অবশ্যই বিশেষ্যের পূর্বে বসে। যেমন – তোমার দাঁত বের-করা হাসি দেখলে সবারই পিণ্ড জ্বলে যায়।

বাক্যে ‘না’ বা ‘নে’ অব্যয়ের ব্যবহার

(ক) সমাপিকা ক্রিয়ার পরে বসে। যথা – আমি যাব না। আমি ভাত খাই নে, রুটি খাই।

(খ) অসমাপিকা ক্রিয়ার পূর্বে বসে। যথা – না চাইতে দানের কোনো মর্যাদা নেই।

(গ) বিশেষণীয় বিশেষণ রূপে বিশেষণের পূর্বে বসে। যেমন – না ভালো, না মন্দ।

(ঘ) ‘যদি’ দিয়ে বাক্য আরম্ভ করলে ‘না’ সমাপিকা ক্রিয়ার পূর্বে বসে। যেমন : তুমি যদি আজ না যাও, তা হলে খুবই ক্ষতি হবে।

‘না’ (নঞ ব্যতীত) অন্য অর্থে

ক. বিকল্পার্থে : জিজ্ঞাসাবাদক বাক্যে – তুমি বাড়ি যাবে, না আমি যাব?

খ. অনুরোধ বা আদেশ অর্থে (নিরর্থকভাবে বাক্যের শেষে) : একটা গান গাও না ভাই।

অনুশীলনী

১। প্রত্যেকটি প্রশ্নের চারটি করে উত্তর দেওয়া হলো। সবচেয়ে উৎকৃষ্ট উত্তরটিতে টিক (✓) চিহ্ন দাও:

(i) বাক্যে সমাপিকা ক্রিয়াপদ কোথায় বসে?

ক. প্রথমে

গ. উদ্দেশ্যের পূর্বে

খ. শেষে

ঘ. অব্যয় পদের পর

(ii) অসমাপিকা ক্রিয়াপদ বাক্যের কোথায় বসে?

ক. প্রথমে

গ. বিশেষণের পূর্বে

খ. শেষে

ঘ. বিশেষ্যের পর

(iii) বাক্যে বিধেয়-বিশেষণ কোথায় বসে?

ক. প্রথমে

গ. বিশেষণের পূর্বে

খ. শেষে

ঘ. বিশেষ্যের পর

(iv) বাক্যে বহুপদময় বিশেষণ কোথায় বসে?

ক. প্রথমে

গ. সর্বনামের পূর্বে

খ. বিশেষ্যের পূর্বে

ঘ. শেষে

(v) ‘না’ শব্দটি বাক্যে কোথায় বসে?

ক. সমাপিকা ক্রিয়ার পূর্বে

গ. অসমাপিকা ক্রিয়ার পরে

খ. সমাপিকা ক্রিয়ার পরে

ঘ. বিশেষণের পরে

(vi) বাক্যে কারক-বিভক্তিযুক্ত পদ কোথায় বসে?

ক. প্রথমে

গ. বিশেষ্যের পূর্বে

খ. শেষে

ঘ. বিশেষণের আগে

(vii) সম্বন্ধ পদ বাক্যে কোথায় বসে?

ক. বিশেষ্যের পূর্বে

গ. বিশেষ্যের পরে

খ. বিশেষণের পূর্বে

ঘ. বিশেষণের পরে।

২। বাক্যে পদ সংস্থাপনের ক্রম বলতে কী বোঝ? এর উদ্দেশ্য কী? সংক্ষেপে বুঝিয়ে লেখ।

৩। বাক্যে পদ সংস্থাপনের ক্রম বিষয়ে পাঁচটি নিয়ম আলোচনা কর।

৪। ‘না’ অব্যয়টি যদি নঞ ব্যতীত অন্য অর্থে বাক্যে প্রযুক্ত হয়, তবে সেটি কী কী অর্থে ব্যবহৃত হতে পারে? উদাহরণসহ আলোচনা কর।

৫। বাক্যে উদাহরণ দাও :

(ক) বাক্যে জোর দিতে গেলে ক্রিয়াপদ বাক্যের প্রথমেও ব্যবহৃত হতে পারে।

খ) স্থান ও কালের অর্থ বিশদভাবে বোঝানোই অধিকরণ কারকের উদ্দেশ্য, কাজেই বাক্যে অধিকরণ কারকের অবস্থানে কোনো বাঁধাধরা নিয়ম নেই।

সমাপ্ত

২০১৬
শিক্ষাবর্ষ
৯-১০ ব্যাকরণ

দারিদ্র্যমুক্ত বাংলাদেশ গড়তে হলে শিক্ষা গ্রহণ করতে হবে
– মাননীয় প্রধানমন্ত্রী শেখ হাসিনা

কারও মনে কষ্ট দিও না



২০১৬ শিক্ষাবর্ষ থেকে সরকার কর্তৃক বিনামূল্যে বিতরণের জন্য

মুদ্রণে :